



赤城後集卷之二十一

正學先生事狀

陳紀

先生名孝孺字希直姓方氏裔出桐廬玄英處  
士宋初徙居寧海侯城里魯祖子野祖炯元鄞  
縣儒學教諭父克勤母林氏以至正戊戌生先  
生癸卯母歿時方六歲哀慕如成人洪武辛亥  
隨父知濟寧謁曹國李文忠公公禮貌之期為  
國士乙卯父被誣下獄上書丞相府願以身為



軍贖父罪丙辰以文謁金華宋太史公于翰林  
公視其凝重不遷於物穎銳洞釋諸理有喧啾  
百鳥中見此孤鳳凰之喜館置左右譚經歷三  
時會父坐空印事草疏將詣關伸理值父歿  
扶襯歸葬丁巳太史公謝事還浦陽先生復執  
經往侍凡理學淵源之統人物絕續之紀盛衰  
幾微之載名物度數之變無不言之析於一絲  
會歸大通每初發其端即能逆推而底于極見

於論著文義森蔚辭意濯然常新未始有增進  
修之功日有異而月不同僅越四寒暑而已庚  
申之秋歸省祖母公惜別因序其素有之善勗  
以遠大之業且曰予所許者不獨在文後二十  
餘年當信其為知言辛酉公徙蜀先生往省不  
獲為文籲天願以己之壽年輸委乞延師命壬  
戌秋在郡城會葉林張陳四君子登中山絕頂  
縱談千古竟夕不寐先生自以此樂乃蘇子瞻

死後三百年所無也癸亥召至京以疾還壬申  
復召除漢中府學教授有令許至家與妻偕往  
癸酉閏四月到任時京府啓儲君四川遵蜀王  
命俱以鄉試考文見徵先生辭四川赴京府甲  
戌春朝蜀獻王道經變得謁宋太史公墓而  
恤其家王好善忘勢召對不名賜號其讀書之  
室曰正學學者稱為正學先生自是書啓往復  
無虛時其賜教有曰闔閭志義為百世光華先

生謝云惟當克己慎行益厲夙心體國忠君不  
負所學丙子考文京府戊寅

高皇帝賓天

皇孫嗣位召為翰林博士己卯

陸侍講命考文京府庚辰復司會試一時君臣  
道合有大制作若省躬殿銘凝命神寶頌御史  
府記東甌王神道碑銘皆出先生手是時海宇  
謐靖幽州兵起先生憂國追惟劉中丞基為之  
淚下未幾天命有歸先生以死殉君至於夷滅

不変上距宋太史公惜別時適二十餘年矣知德之深知言之至至是信哉為文雄邁醇深所著述有基命錄武王戒書訓釋周易枝詞十餘卷宋史要言起太宗盡哲宗凡十卷今皆不存所存周禮辨疑宗儀雜箴雜戒深慮公子問對釋統上中下等篇然當時有禁又五十年鄉之儒紳始蒐輯成帙鈔梓以傳南安守華亭張弼題其卷後曰篤信好學守死善道宇宙之間僅見

此老九原有知亦足以少慰也夫子小子景仰先哲直以甲子書其所信者以示不忘

史大林君墓表

方希直

元之有天下尚吏治而右文法凡以吏仕者捷出取大官過儒生遠甚故儒多屈為吏吏皆忠厚潔廉寬於用法而重於有過勇於致名而怯於言利進為公卿者既以才能政術有聞于時而在郡邑之間者亦謹言篤行與其時稱豈特

吏之素賢乎士而為吏宜其可稱者衆也元亡  
未久而遺風舊習與之俱變求之於世若林君  
者蓋鮮矣吾是以喜稱之君諱得世字一元台  
寧海人其先臨海黃氏自其祖德秀從母為林  
氏子考仁壽來令寧海因家焉君少好學通經  
史大義有士行居母喪如禮事後母有子道長  
而明習世故恢竒卓偉貌莊氣嚴善辨說事當  
否得失而料其成敗後輒驗邑人多慕與遊

國初知縣事李茂聞君才請與相見一見竒君  
曰吾不敢屈然使吾憚於政而病寧海之民君  
亦有不利焉願強佐我君語以土俗利害輔以  
義理法律因葦翁張一本於愛民勸之立法以  
成步而度曰君為冊書據其多寡以定徭役民  
久而樂其便歲餘遷四明之定海定海杜令知  
君名事之難決者必謀於君無不立斷會歲大  
旱民合辭以灾告郡守庸怯畏得罪過斥不肯

受屬縣承守指禁訴災者民力爭于令獨受民  
辭違于郡請上聞卹被災者租守怒徵租益急  
令憂不知所為君曰官為國家牧小民當以死  
為小民爭之柰何畏守一怒而為惠不終乎令  
用君策抱印章持文書伏守庭下涕泣乞自免  
守猶持不許適羽林耿將軍奉詔行天下問民  
所苦民以被災狀自言將軍速郡縣官不受民  
辭者將寘之法令出文書袖中獻之將軍驚曰

浙東七郡無一人以旱請于朝而令獨有憂民  
心可嘉也今以君本謀對將軍特免出令餘皆  
問罪如法遠近聞之莫不多君以為賢令由是  
蓋信君謂君愛己君亦知無不言民有兄弟分  
財致訟者令欲以法繩之君謂彼以財而訟已  
失兄弟情令不教訓而直待之以刑是使其兄  
弟終身相怨無已也雖欲敦睦而無繇令因諭  
以倫理歸其財而遣之縣正田籍或以田詭寄

他人以避正役覺令欲徙之君曰誠信未洽使  
民為詐非特民之罪也今遽徙之失為民父母  
意卒得不徙令改作城隍廟患材木無所取君  
建議毀淫祠佛寺以給其用海上盜掠官所運  
鹽官欲償於民君持之堅民得不困其識大體  
善因事利民皆此類後竟坐以盜掠益奏報緩  
期謫潁上居七年復起為刑部掾閱兩月丁繼  
母憂歸以洪武辛酉六月十八日卒于家年六

十一君脩行誼有器度始父歿時君偶出不獲  
躬侍藥餌後遇忌日必悲哀卒之前五日病革  
矣妻子以忌日告猶強起以衣冠拜奠成禮如平  
時鄉先生舒公平初以宦勝國北徙病死昆陵  
為携其遺骨還葬其在潁上兵後暴骨滿野率  
家僮拾而瘞之而有恩教于必以禮義娶吳氏  
生二子旭昶先君三年卒之歲十二月十日合  
葬縣南許家山之側室葉氏有子男三人曰昇

昇昂旭蚤死而昇善學勵行服喪不近酒肉者  
三年述其所知事行為書請識君墓余感夫世  
之銘墓者恒以位而不以德爵號崇顯之人過  
惡衍溢而猷為之書秉志篤行之士不幸無位  
則棄而不錄故善者未必傳而傳者未必善也  
夫德合乎天者位受乎人者也天之得而人之  
遺美也人之隆而天則替耻也賤其美而不貴  
而以恥為榮豈理也哉君之得於人者雖微而

其志之美蔚然而可稱過夫世之位有餘而德  
不足者多矣彼則務合乎人而此則求合乎天  
也人事快於一時而天道必徵於悠遠遠子孫  
其昌尚勸為善

修撰王公墓記

周瑛

去廣德城西十里許王修撰墓在焉修撰故台  
州人姓王氏名叔英字原采有氣節建文朝為  
文字官未幾

文皇帝南巡原采募丁壯廣德遂自經而死死  
時嘗自為贊曰生既久矣未有補於當時死固  
徒然庶無慚於來世又自為詩曰人生穹壤間  
忠孝貴克全嗟予事君父自省多過愆有志未  
及竟竒疾忽見纏肥甘空在案對之不能噉意  
者造化神有命歸九泉嘗念夷與齊餓死首陽  
巔周粟豈不佳所見良獨偏高蹤邈難繼偶爾  
無足傳千秋史臣筆慎勿稱希賢尋有

詔治姦黨其二女赴井死其妻繫獄死人為上  
其所賦詩

上曰彼食其祿自盡其忠乃置不問初原采將  
死以書抵祠山道士盛希年曰可葬我祠山之  
麓希年卒收葬之蓋原采同希年台州人故托  
以後事正統中少師楊公士竒始為題其墓曰  
嗚呼故翰林修撰王公原采之墓且為文以祭  
之曰先生之學聖賢是師先生之行綱常是持

先生之心金石其貞先生之志霜雪其明浩然  
全歸乘雲翩翩我懷先生崇山長川桐川之藏  
既固且深遙致觴奠神其來歆蓋原采嘗薦揚  
公建文朝久後事定故及此原采死無後墳墓  
陵夷鞠為丘葬所可識別者僅有楊公之碑而  
已瑛初為進士時嘗聞其事於其鄉之諸縉紳  
及官廣德首以特羊祭於其墓繼而訪諸故老  
得其遺事為詳云原采入廣德未幾車駕渡江

郡人皆出走原采募丁壯番上遇兵部尚書齊  
泰來奔皆潰歸原采以齊為二令州人執之既  
至告以故其夕原采引決原采死時年未四十  
蓋其見義之明殺身之勇處死不亂良繇有所  
養非若一時忙迫失據計出無聊而自經於溝  
瀆者之比也因念其行義之篤且悲其無後而  
為修治其墓并述其事以告後人或議之曰原  
采建文臣子子不為諱而表章之非罪耶瑛曰

不然也自古忠臣義士各為其主耳原采仕建  
文朝故終於建文若仕於

太宗朝則忠

太宗也必矣况兩朝天下皆

太祖高皇帝所經營之天下兩朝臣子皆

太祖高皇帝所培養之人物也譬如天地分為  
四時凡禽鳥感時鳴者雖有春秋之異要皆造  
化中物未可舍此而取彼也議者謝曰子之言

是也麗牲有石其饒諸

饒陽知縣郭公行

狀黃友義

公諱楨字德茂號暢軒其先東陽人五代時有

為永安鎮都監者因家焉永安今仙居也

傳八世至宋朝請大夫諱仲珉始大仲珉生瓊

筦安撫宗之宗之五子曰森卿夔州通守曰明

卿湖南總幹曰在卿兩浙都兵馬台州路分曰

喜卿以朝請大夫致事于

示城行錄卷二十二  
特賜號繼一處士曰石砢卿右正言贈金紫光祿  
大夫謚正肅公皆以風節振厥家轂其去卿生  
太常寺丞勉中勉中生左右司員外郎友直是  
為公祖也父敏夫不仕以儒世其家友直娶樂  
邑橋亭劉氏遂居橋亭至公始從伯父叅知政  
事實寬夫遷黃巖之松山里焉公天性明敏少勤  
學問迨壯獨有所悟脫去詞章習由伊洛上溯  
洙泗求聖賢真心實行以自進德燕居獨處衣

冠脩整祈寒盛暑危坐終日若不可犯及與人  
接和氣滿容閉門掃軌簞瓢屢空晏如也其所  
涵養專用靜中工夫視聽言動一循乎禮士大  
夫間莫不尊仰之如泰山北斗初尊府君既沒  
以兵荒不克葬者十餘載公抱憂戚未嘗破顏  
迨營塚壙或以左道沮之公曰陰陽家禍福之  
論實不足信苟得先入土雖死無憾遂葬奉  
母杜氏極其婉愉晨昏溫清衣服甘旨出乎至

誠長兄梁多子累生理且艱母顧念不忘或有  
所需百方營辦以進不以空乏凝母志患風疾  
奉食飲進藥物衣不解帶倦則假寢於床下不  
敢離左右親為浹面澡身浣衣滌席凡六越月  
手指濕爛成瘡終不許人代比卒哀慟絕而復  
甦水漿不入口者三日襲衾衾絞悉遵古制朝  
夕哭臨於禮則有過焉四時祭祀必請長兄主  
之裸獻陟降恪盡誠敬鄉里稱之事兄盡愛敬

先府君遺業兄欲售於人命同署券公畧無吝  
吝亦不分其直兄或告寒即解衣遺之或告饑  
雖斗粟亦剖分之又叔兄次子燾教食同於己  
子宗族姻親恩義俱至雖鄉里狡悍見公亦皆  
革面輸款其誘掖後進必使收其放心曰收得  
心方驗得聖賢言語有歸着又曰學者若不懲  
忿窒慾則自家都壞了此大切要處又曰作詩  
寫字悞了天下多少英俊不遇作者之聖變更

之終不見文武全才又嘗與學者論治道曰治天下當法三代蓋世降風移事業僅及漢唐効漢唐則下矣必須力掃積弊大更張之方可不然為治皆苟而已

皇明洪武四年監察御史李公時可薦于不肖朝召試吏部公以性理之學辭考官怒公有才不屑抑授饒陽縣知縣饒陽隸真定府之晉州先是府若州人緣公事以漁民者填溢公門公

下車望見威儀竊相謂曰是豈私我者耶皆遁去署事日察兵站以革豪戶之夤緣撫遐荒以來飢民之逃匿以倫理開僧道使之有偶以禮義論倡優俾之從良立分數法以均田賦設方同令而平力役勸農桑興學校表節義黜奸猾懲吏弊汰公卒毀廢寺壞觀淫祠以葺理公辭文廟稅局真定衛議選軍科本縣五百戶責要民未著土者充之公以民戶凋瘵方招集之未

遑今復選以充軍是行誑誘術豈為民之父母  
哉遂力爭於衛不得已於北口流亡不根著者  
三丁取一得五十戶應命幕官周公矜公懇款  
止以二十五戶少壯者入軍餘遣還民甚德之  
既而軍中着刷民間驢疋公謂民間有頭疋或  
倚以當差或仗之給食刷去民何為活復即申  
谷民尤賴焉五年夏旱舊俗鄉社聚龍王像以  
禱公命焚之出舍公辭秉誠默禱天即大雨一

尺深民始驚信秋聘授分垣同考試官越明年  
旱蝗荐作民食木皮草實公上其事

上勅尚書劉公賑之仍免田租弛力役旁及晉  
冀武強安平南宮新河武邑棗強等處繼遇沍  
辦軍裝令民出布官酌直布一疋支鹽二十斤  
綿花一斤支鹽六斤後大明府申時估布一疋  
直米三斗鹽二十斤直米六斗劾為倍給省垣  
命八府照例追還饒陽該米千石之上公以歲

凶民艱又上其事

朝廷責問分垣如此非惟法度不一抑且失信於民已收者給主未收者免徵公以身體民不顧利害類如此至今有自北方來者莫不曰郭公為政當於古人中求之七年秋解組饒陽其新令尹左公景仰公德率僚吏餽絹一車為道里費追運至

京師卒辭不受改陞間有

首凡重刑之家不許叙用公以從兄學士故放還翌日巡事者察於途囊無長物惟得所著書與詩文一篋瓜髮一束以聞

上亦素知其忠清加賜紗幘銀帶及寶鈔一伯貫以華其歸後因念平生所學弗克少展遂更號台南兀者公生於壬戌正月二十一日以癸亥四月廿九日卒得年六十有二從子煜洎諸友人翰林脩撰趙新考論公之德相與私謚曰

真成先生有詩文數十卷有雜評一帙有易說  
未就而卒以是年十二月十五日葬于溫嶺之  
西原公配徐氏與公相敬如賓事尊章善執婦  
道先公八年卒公德之成余氏有助焉子男二  
人熙娶陳氏丞侍公出仕以疾卒于金陵孫男  
斐孫女萬金層娘友義既與公為忘年交且熟  
聞其世系事實茲從熙請姑掇其大者為狀以  
俟立言君子銘于不朽云

三四 紀善鮑先生墓誌銘 黃黼

伊府紀善黃巖鮑先生以永樂庚寅四月十九  
日卒于京師將歸塋于某山之原其孤珙手疏  
先生事狀泣請余銘先生嘗司訓樂清縣學以  
身為教其化大行余承乏茲學而先生方滿去  
雖不及會而聲光運氣猶存予竊歆慕不已其  
何敢辭按狀先生諱仁濟字原弘號恕庵其先  
仙居人宋武畧將軍伍徙樂清之楊川五世祖

復遷黃巖之三坑六世祖又自三坑遷居龍井里大父有隱德元賜號樂閒居士父性善名易學者宗之妣金氏嘗於四月八日產子不育後夢其子曰我今為三坑盛氏家兒不樂於彼當於四月八日復生母家後果以是日生先生識者曰賢哲之生自與常人殊是子其異於人哉元至正戊子歲也先生幼穎悟拔出群兒中甫三四歲人口授以書輒成誦不忘稍長刻苦問

不以祈寒暑雨少懈父竒其志遣從石門陳公鑑翁遊公之學得之於進士蕃遠祝公於公得之玉峯車公上泝考亭蓋學之有源委者也於是益肆力群經百氏之籍尤精蔡氏書作為文章精密雄健一主於理當元季有薦為方岳者將浮海北上大父樂閒翁知時未可戒之曰適百里者當為晴雨之計適千里者當為寒暑之計適萬里者當為死生之計汝獨不為死生

計耶其行遂厄日取聖賢微詞奧旨探索根底  
以為真知允蹈之本平居恒以矩矱自持言行  
無微弗謹事親至孝凡可以樂其耳目心志者  
靡不用情有疾則憂形于色食不下咽衣不鮮  
帶不惟湯藥必親供而扶持澡洗亦未嘗輕委  
諸侍兒也服喪哀毀骨立歛葬一遵文公家禮  
伯兄原謙好學工詩先生事之如父恒以所學  
相師友不啻麗澤之相資其兄因以受益名其

歲脩之所遇宗族親舊俱篤於恩恤患難周匱  
乏植孤弱莫不悉心慮圖德之者甚衆鄉之暴  
悍多化其德是以雖當擾攘而閭里賴之以安  
初入

國朝累徵秀才以母老不赴洪武二十三年始  
應樂清尹熊公之薦授樂清儒學訓導先生以  
敦本尚實為教一趨乎正文藝則隨其材而課  
之無厭倦意成德達材彬彬輩出永樂改元考

績銓曹陞

伊王府紀善未幾以事少員多詔還家閒住因自號閒住老人涵養益密從學之士四方雲集凡經造就卒為名士作為家譜自始遷祖而下數世人各為傳令緒善行歷歷可考又繪其丘壠為圖記之俾子孫世守弗失也初其師石門公愛先生之賢以孫女之後公誣籍歿無後先生為文招公之竟祠于家別館俾妻陳氏祀之

終其身嘗預告祖考請還以客禮此禮以義起也哉者題之文樂丁亥

王之國子伊檄起先生蒞政先生竭力輔導知無不言罔避艱險疏撰治國要道十二章以進其曰曰祖訓曰

聖恩曰典章曰經史曰正心曰無逸曰知過曰納諫曰任賢曰去邪曰均愛曰立規情真辭切有足動人者二雖不悅其言亦以禮聽納歲庚

寅入以事力爭不已三深銜之欲坐以誑誤先生往訴于

朝時名卿若王公准胡公儼楊公士奇皆素知先生者深悼其不幸謀為白之薦擢雲南提學官會

皇上親征未果竟以疾終嗚呼惜哉享年六十有三有詩文若干卷歲于家配陳氏先二年卒子男五人長玠次即珙由鄉貢進士通判廣信

府有能敬次琰次琢俱嫡出次琫庶出皆能以行義世其家女一人適士人樂清施順祖孫男五人孫女五人葬則卒之明年辛卯十月甲子也銘曰

學之正行之純仁乎族悅乎親化殘暴安里鄰廓經筭充典墳為文章著經綸推為教善作人曳長裾為蓋臣敷治道辭諄諄力諫諍致厥運雖塞志亦伸國著龜時鳳麟吁已矣勒銘文千

百載揚清芬

赤城後集卷之二十一終

赤城後集卷之二十一

贈少保徐公墓銘

永樂甲申春

詔簡

東宮官屬時詹事春坊司經其長貳以廷臣兼

之次簡六科中書及太學郡縣學官悉陞而用

之極一時之選而自太學陞者兩人博士天台

徐善述好古陞左司直即助教鄆城晁鑄景範

陞右司直即其學問之正操履之篤温厚而簡

靜皆為縉紳君子所敬服以謂輔臣之良也後  
十年景範年八十奉直昭溫公碑於吳越之  
命致仕歸好古既陞左贊善永樂己亥九月景  
範卒于家十月己亥好古亦卒於官蓋縉紳君  
子又皆嗟咨悼嘆傷老成之喪也好古一志儒  
者之學尤邃書經其講說及為經義皆精確非  
衆所及少為縣學生已有聲譽洪武中初行歲  
貢法首充貢入太學六館之士皆推之祭酒宋

訥嚴不可近獨禮接好古歲餘

詔選太學生為州縣教官好古為首授桂陽州

學正

賜勅符後丁父憂服闋改和州學正用薦陞國  
子博士經其教者率有成嘗預纂修翰林者累  
年考鄉試者一考會試者二士服其公其在春  
坊一用所學進講之際簡明質直必據於正理  
故尤見禮遇而卒之日

賜祭之文極褒惜焉平居寡言其中所執確然  
未嘗枉已徇外性淡泊寡交處家貧于于自足  
手一卷雖老不釋可謂真能絕俗者矣蓋年六  
十有七而卒徐世家天台宋之亡其幼主趨慶  
元南奔元兵追之徐氏有為追義副尉者率鄉  
兵阨閩嶺之險元兵不能度宋主得浮海去元  
兵既入天台徐氏無少長皆被害獨乳媪負所  
乳兒脫走得全好古高祖也自高祖至其父

皆業儒好古娶朱氏邑名家有婦德生子男二  
行衍女四長適翰林庶吉士永嘉王道次適同  
邑朱瓊二未行孫男三女一既卒之明年行衍  
奉柩歸十月日啓其妣之窆而合葬焉先  
事以庶吉士葉頴所述行狀請銘士奇初被徵  
與好古同事翰林及其擢春坊又同僚蓋相與  
廿年知之深矣義不可辭為之銘曰忠信以為  
車兮廉以為旟兮道乎平直之衢矣確乎不可

渝号展乎君子之儒号

兵部侍郎徐先生墓表 黃淮

先生諱宦字宗實以字行姓徐氏別號靜齋其先東海邠人也歷晉唐不族寢大以蕃簪組相繩不絕宋南渡有

者來令黃巖其子榮

遂占籍為黃巖人其父之曾祖也祖諱已元樞密院經歷父諱存翁樞密院都事母車氏封宜人先生兄弟三人而先生居長天資穎銳豪邁

仲弟宗茂季弟宗原皆有異質昆弟自相師友先生弱冠聞永嘉史公文璣承徽國文公正傳講學鄉校同弟往從之游深有所領悟先生年漸富而學日充負才尚氣有經綸天下之志慕范文公之為人恒誦先天下之憂而憂後天下之樂而樂之語拊九昌言必如是而後可謂士矣居無何元運告終弗克以展素蘊於是贅居永嘉設塾授徒若將終身焉時准年十六叨選

入邑庠充弟子負幸獲受業于先生之門凡四  
寒暑先生剛毅嚴正約教條為學規務實理而  
不尚浮詞嘗罰勤怠悉當其情諸生咸知振勵  
洪武壬戌先生膺聘詣闕數被顧問敷奏剴切  
灼中時宜曰武臣大司馬太祖授司風紀職先生以草茅愚孱辭除銅陵  
簿復請歸迎母就養文獻通考

上怒謫役淮陰驛郡邑景仰先生聞至爭出迎

延至為賓師多所造就楊靖尚書在庠校率先  
受業未幾起為附馬都尉胡觀師教法嚴明如  
在鄉塾時觀受教惟謹既冠入府成禮畢每當  
講授中使援他府例設駙馬位于堂北牖下南  
面而置師席于西階上東面先生憮然曰師嚴  
道尊道尊然後民知敬學手引駙馬位使下為  
說書明日貽書責以三事大義及富貴驕入之  
說觀泣下媿謝執弟子禮愈恭畧紈綺之習尚

儒雅之風

太祖深喜之召見獎諭再三復命駙馬梅公三公輩訪論稽古咸有新益時屢聘主秉文衡之柄取士如鑑空明妍媸莫逃奉旨作饒歌鼓吹十二篇以為樂典東宮面賜題僊女醉歸圖援筆輒就中寓人情易蠱之義頗切且欲褫付兩上聞而喜召見褒賞洪武中任蘇州府通判治有異政蘇守李善薦于朝曰此人大用可致雍

熙詔擢兵部右侍郎嘗欽勅出使兩淮兩浙以過家稽留被劾遷尚寶司丞不數月復起侍郎其判蘇州也秦發粟二萬賑活饑民當春暴水啣隄為患先生興治水之役採訪使以為妨農勞民沮之先生上言他役可以妨農止水不退則田不可耕妨農莫甚焉廷議聽之郡乘載節婦王氏先生請旌之禮部以前朝事不允先生以武王封比干非前朝事乎至今以為盛典朝議

謂知大體從之工部需銅數千斤促辦倉卒先生見一寺有銅佛巨甚為文告曰佛以慈悲為本今官民迫切罔知所錯舍銅像而易以土勿斬真慈悲也乃碎之應數上下驚肅其入為侍郎也首請移整風俗罷元不急振舉裁定賦稅撫安農業開政教之路塞異端之源進賢退不肖等十事皆切時要吏部尚書張統戶部尚書王純兵部茹瑯都御史毛大芳會決疑定後先

生是是非非有所見歷言之不徇私不黨同一揆於義以故多相矛盾所陳事有寢而不行者其欽使淮浙也便宜行事潘闡州郡聞風震聳至見廉能者禮之闡茸者黜之所建議密緘以聞

上降手詔曰知卿深有識見從便處置海州有節婦侍小花年十六許嫁而夫亡歸夫家成喪養姑剪髮自矢採訪使上其事請旌之所司以

其年未五十不合例先生奏此婦立志卓異難  
與尋常守節者比卒從其議自淮適蘇道遇旋  
風荐入回翔而後去先生異焉遣人隨蹤至湖  
次止乃拆湖却水得數死屍蒿藿下衣裳中有  
小印及梭布目錄知商者為盜所害戒所由勿  
洩詔言部劄買布甚急且溢其價於是輸布者  
雜還潛以小印窺驗竟得賊莫敢不服浙西有  
郡庫與僧寺密邇偶而庫焚衆各寺僧失火下

之獄先生審庫多桐油嘆曰非僧罪也取油數  
簾置烈日中驗之晝而火發衆皆驚異獄遂釋  
是以勲業益廣寵眷益隆朝士竊相以徐雍熙  
目之先生年漸老而志猶壯適兵興奉使招集  
兩浙義勇又明年

太宗皇帝入正大統家因以覆卒于京侃然之  
氣不少衰是為永樂改元也生于元甲申六十  
有二次子扶櫬歸葬于岱石山之原配潘氏永

嘉士族子男三女一適同里金氏水南徵士之  
孫也仲弟由徐聞教遷講經筵隨二齒語音訛  
謬奏請守塋隴遂令黃巖教終季弟邑庠生從  
弟宗顯歷胄監官至禮部主事所著有朋月集  
當時人稱徐氏三鳳焉先生平昔交游皆峻宦  
名士或同事於試院或胥會於解宇慷慨發達  
肝膽相照分韻賦詩竟日忘倦訃音遠聞傷之  
者至號慟頓足嘆息士林之寥落也嗚呼剛毅

正直人之美德也先生以之立大節陳大義致  
位通顯收令譽於當時其亦不幸至於垂老客  
死于外嗚呼其得其失也何相去之頓絕邪蓋  
其得也由乎已道之所存其失也係乎人莫之  
致而致也莫之致而致有何尤焉淮念啓沃之  
功師生之義沒齒不忘謹撫行業之見聞者表  
諸墓道以慰遐思且以昭示後人俾有所觀感  
云

提學憲食陳先生墓誌銘

劉定之

昔者聖人作經垂世使後之士明其所載之道以篤諸行以達于政而又永其傳於徒類是以有天下者惟以經取士豈不賴其為用若是哉然而能焉者罕矣夫惟臨海陳先生其有以與於茲乎先生諱璵字廷嘉弱冠以詩經連魁浙江禮部試入翰林為庶吉士檢討典修五經四書性理大全蓋時之習經者專攻偏曲摭摭浮

冗以成篇章甚至剽誦陳言莫能自吐辭也先生雖主詩而他經群籍出入貫該故發聞于藝場辭館甚蚤而傑出倫類其於道豈不明乎見之於行尤以孝友為先歲除日聞父在任有疾即奔馳數千里以往毋疾晨夜視湯劑以祿養者數十年而侍庭闈之日多在宦途之時少母終年踰九十而先生亦年過七十矣而孺慕盡禮已為長兄以率七弟其一入從歿於京寓既歸

葬其柩復遷窆于已所營墓側以已子煥為之  
後其三人先逝為之撫孤畢婚嫁其三人與先  
生怡怡終老于林泉先生之行豈不篤乎自檢  
討歸里復赴

召贊文衡任憲僉歷與廣西江右學政督勵士  
習懲抑吏饕詢察民隱罄其心力者三年以報  
政于

朝而復致事以歸於是時去古禮大夫告老之

期尚先十稔也有難進易退之風焉鄉俗葬尚  
浮屠婚較貲財正論以變之孤貧不能養疫疾  
不敢視推仁以濟之朝士嘗欲建言徵嶺海匠  
詣京翰作諭以遠民宜卹台郡守治務嚴察闔  
境凜慄諷以政宜循良皆重先生從其言先生  
之政豈不達乎其所開發造就如先生本族有  
搏常聰稠豫相繼任臺察教王府師侯泮他族  
有侯通政閩與方伯臣兄弟也陳方伯負韜與

御史選父子也林郎中貴璧與憲使一鶚叔姪也莫不執贄挾冊前趨後侍數其珠璣駢者若此他雖賢且顯不可悉數先生之經所傳又豈不永乎其官終僉憲而以恩例進階朝列大夫其壽八十有二所著有逸庵集若干卷其先自永嘉以宦來徙臨海曾大父貴實大父志靜父福清教諭與助皆有德善母虞安人配蔣氏繼室葉氏內範世承子男四人族貢煥睽旅翰林

孔目煥鄉貢進士未第而卒女三人徐夔洪堯周一清其壻也一清今為慶遠府知府子與壻皆受教于先生者也孫男十四人憲寧密察寅寵寯憲守宙寯完宥宥女三人其婿阮讜程白王璠旅聞訃將歸葬先生於其鄉梅浦鱗坑山之原以先生門人翰林檢討侯丕所述狀來請銘銘曰

魯叟教人必興於詩庭訓厥子首先以茲聖遠

儒陋膚淺鮮知惟陳先生深造遐追亦篤于行  
不但浮辭白華之孝樂養期頤棠棣之愛眷令  
鳴飛死也我求生也我依考槃之歌隱處孔宜  
泮水之教浙堦江湄海北嶺南萬徒千師陶英  
鑄俊受我成規先生歸矣其教不衰今其沒矣  
文塚巋巍金緋在幽遺經在笥嗟爾後覺尚繫  
爾思豈惟子孫克念紹之

吏部考功員外郎李公墓表

魏驥

國家設科取士以其士之才足以致君澤民而  
取之也故士之所學朝斯夕斯亦惟攻其致澤  
之術俟其需而展之爾夫何士於既出輒昧所  
學不卑卑焉為勢利之所屈則齷齪焉為貨賄  
之所移求其於所學不背馳不僨事不懼辱不  
負國家之盛意與所學者誠不多得余友李公  
茂弘字用受台之黃巖人自登進士時予已知  
其名而未之識及聞太常少卿錢塘儀之王先

示城後集卷之三十一  
生道其學行之詳而喜其為人名不為虛得者  
矣一日過翰林會東里建安南郡三楊學士先  
生談吾輩人物之長而建安歷陳用受為主事  
時緝事閩藩有為有守之賢而東里南郡亦從  
而嘆賞之不置故予因其友工部主事李文定  
邀致之而與之會一見若故自是相與日密始  
悉知其學之正操履之篤竊慶科目之求而有  
斯人哉惟時

求賢之詔屢下建安欲薦之以居禁近或曰惜  
用受鄉音未變爾清謹之才用之自有其地姑  
止未幾吏部考功主事負闕方難其人適用受  
自黃巖行焚黃禮還少師吏部尚書蹇公遂奏  
改考功主事余時為考功負外郎與之為同僚  
聲應氣求視昔裨益於余為尤多匪特予得其  
裨益自尚書而下咸慶以為得人及予陞南京  
太常少卿執別之頃用受謂予曰某與執事相

見未知何日某之鄙陋惟是而已倘有不逮乞  
直書見遺俾某始終不忝所職幸也既別聞用  
受水蘖之操益厲予甚喜之且聞其主事書考  
例得序進正五品時吏部無正五品卑一級有為用受久  
為攷功負外郎視正五品卑一級有為用受久  
居郎署不有峻擢為惜者用受聞之曰人苦不  
自知苟躡等而進其於吾才何上官愛我留我  
且駕輕車而就熟路何不可乎其善擇所處安

於所遇又如此久之天假其緣予自南京蒙駟  
召為吏部侍郎又獲與之周旋以序平生既而  
用受以負外郎秩滿予適奉

勅巡撫淮甸執意竟以老疾辭廷臣知者咸留  
之而不可得遂歸踰八載予亦謝事還山彼此  
方期抵掌遊遊滌水東西以樂所樂無何屬疾  
至于不起實景泰壬申正月十九日也享年七  
十有四嗚呼悲夫上世閩人被亂徙黃巖初姓

林氏以舅氏無後曾祖天麟奉父命為其後故  
子孫因循以李云祖原紳洪武中膺明經薦遙  
授知縣試事戶部父長民以用受貴贈承德郎  
北京行部戶曹主事妣茹氏繼楊氏皆贈安人  
配丘氏封安人子男三人曰謨正統辛酉鄉貢  
進士蘇州府學訓導操履廉正有父風以居父  
喪哀毀而卒孝子也曰詵先十二年卒曰恩讀  
書惇行恪守先志女一邵能約其壻也孫男五士

嵩士亨士孟士蘇士瞻孫女三其葬之所里之  
管監山之原也嗚呼用受敦重貞慤廉介沈毅  
不奔競不詭隨遇事不擇夷險為之無毫髮或  
戾所學故凡三為主事一為貢外郎皆劄司也  
經事

四朝幾四十年所為所守玉潔水清始終一致  
其視卑卑齷齷有媿科目與平昔所學者不其  
大有迥庭即年雖以躋中壽惜位不建德而所

施未究其蘊焉爾賢哉用受令其已矣安得應  
科目之求能人人如用受哉予念與用受相知  
非一日及為同僚彼此一心誠所謂異姓骨肉  
也今而幽明遽隔亟欲臨總惟一慟而不可得  
茲恩奉前翰林檢討江西按察司僉事致仕陳  
先生狀求予表其墓夫陳先生端士也為予素  
所敬慕者其言尤可信其何可辭故按狀撮其  
平生自立自重所學所操之大為表畀恩劉諸

莫門之石黃巖故君子鄉也尚使黃岩後之來  
者知黃岩君子中之有斯人又拔乎其萃者也

羽南張先生墓誌銘

吳節

徵士羽南張先生以宣德庚戌夏終于正寢葬  
已宿草其子璠懼先德之湮泯無以稱追慕表  
揚之義乃齎同邑教諭盧先生行狀來徵銘將  
追而納之壙予嘗忝以科第竊祿詞林從元老  
諸公游每暇且論及慕修事能以恭勤為本者

必及羽南先生然亦未嘗不惜其甘守恬退而未底顯榮蓋君子而負大雅明哲之操者也耳聆既父莫獲識其後人今璿以父銘為請此正予所景慕於疇昔者奚以之辭為按狀先生初諱汝輔改曰羽字孝翊別號羽南姓張氏遠祖諱朝自閩徙溫郡永嘉之張溪七世祖伯四府君跡張溪并徙台之黃岩土鼓里曾祖諱日炎號石窓祖諱俊封從仕郎江浙行宣政院都事

祖妣阮氏封宜人父諱思濟仕元浙東道元帥府都事妣王氏封宜人先生生而天資凝粹警敏自幼頭角嶄然出群兒右十歲能屬文稿長侍父遊宦四明從主一吳先生講究詩律大有所得深為同門士友所器重江浙等處行中書省員外郎燕公敬一見先生竒之遂妻之以女燕公為時聞臣所交多鴻儒宿學先生皆獲親炙以增益所未聞自四明歸復從覲成黃先生

均疇陳先生授書春秋二經擬發身取進士第  
阻於親老留戀膝下不能去性雅好理數於易  
叅同契陳希夷邵堯夫諸書皆窮探深旨自名  
其室曰月窟前太史金華宋公為之記永樂初  
詔徵天下文士近臣首推先生比至宣入文淵  
閣纂修大典書書成例得授官先生以母老力  
辭歸養未幾復被

旨令館食詞林校

書籍暨封上復以終養懇

請于

朝許之及歸無復時事每溫清定省之餘惟深  
衣幅巾逍遙泉石賦咏以自適而已鄉人見者  
咸以張神仙呼之先生領之曰然先生為人內  
明外直動止有儀言論成章人有不善輒面折  
不少貸其為善者則稱揚之不釋口故人皆無  
怨言賓朋萃止即歡洽傾倒不計家之有無人  
有急必盡心為之扶持事已有酬以禮者即却

不受女兄有夫亡子幼者則為之經紀友人有  
被辟而不能上進者則出資為道費宗族昆季  
有家貧不能自給與喪葬不克舉者先生必捐  
粟以為助其為義之心類多若此所為訶咸清  
新俊逸下筆若不經意而士林自相傳誦以為  
難得今存三伯餘篇題曰掬清集以宣德五年  
六月二十七日歿于家享年八十有五先娶燕  
氏早卒再娶濮州范縣縣丞陳叔供女皆有淑

德懿行子男五人長乾齋為縣庠生次曰玄湛  
玄毓玄璵恒陶乾齋玄毓皆先卒女三人長適  
王宜湛次歿次適童嗣泳皆士族孫男十有三  
人辟親僑壬丙襍丁恩遐邇虞其冕孫女五人  
以是年十月乙酉葬于三童鄉建平里東山之  
原予聞盛德之士不在其身則在其子孫先生  
以該博之學純誠之行兩承

召命有纂修校雠之勞是宜列職顯要安食天

赤城後集卷之二十二  
十  
祿者矣乃惓惓焉以孝親為辭歸老田園今子  
孫衆多詩書禮樂之澤益大益繁豈非天之報  
施雖未及其身而其豐厚者乃在其子孫也歟  
是宜為之銘銘曰

維張之先徙閩邦歷溫徙台流慶長祖封禰顯  
勤贊襄先生赴徵際明良校讐盡發金匱藏書  
成拂衣歸故鄉欲效張子房天根月窟樂且康  
掬清之咏何琳琅年登期頤陟仙方有美孝子

溘冠裳追書不女靈封高岡赤城霞彩生微茫毋  
乃潛德舒幽光儲祥衍瑞百千載雲仍奕葉臻  
彌昌

赤城後集卷之二十二終

赤城後集卷之二十三終

赤城後集卷之二十三終

赤城後集卷之二十三

故文林郎知南康致仕徐公墓碣銘

黃淮

洪武中淮與黃巖徐公德新同為國子生辱以  
鄉曲之故交好甚篤丙子同中應天府鄉試會  
試禮部公偶不利還入太學淮遂承乏兩制自  
是亦沈互見而離合靡常矣宣德初年淮以疾  
歸卧丘園會公亦得致政歸故里音問往來不

絕嘗期一得聚首以道故舊不意訃音盡然遠  
臨隕淚如雨痛不可續也卒之明年是為正統  
己未春公之冢孫簡奉其執友應祥所撰事狀  
匍匐遠道來乞銘准與公故友也銘其可辭乎  
敘曰公諱新德新其字也姓徐氏世為黃岩儒  
族曾大父諱山大父諱谷韜晦弗耀父諱佑以  
才辟未及仕而終母相氏公少穎悟稍長即有  
大志方垂髫為父訴寃於三公府辨析詳明官

僚皆稱異之後為舉人還監時循例歸省復業  
愆期殿授山西萬泉典史適遇藩府闢鄉闈選  
士公投狀就試主司覽其文超出儕輩欲寘首  
選或謂出非所部次名第三登進士第授行人  
司行人使命專對克稱厥職尋以才能奉  
旨往寧夏經理邊務隨宜制變用息危疑暨還  
復命允合朝議未幾會更改御史官制慎選才  
德卓異者充其任公用薦被選或有沮之者吏

部宣言此奉使西夏行人也遂授之朝士莫不  
為公榮

太宗皇帝入正大統事復舊制任福建道監察  
御史公素嚴毅剛正至是益加敬慎讞獄詳明  
未嘗妄致一民于辜時方嚴海道之禁有雷陽  
人訐其鄉之違禁泛海者甚衆屬公鞠問以罪  
在赦前釋之惟范甲一人訐者稱其洪武中嘗  
下海黨與伏誅范亡逸苟免至宜伏法范稱冤

公俾歷事監生楊善閱按驗之楊給以按歲久  
閱不可得范遂誣服公察其辭色非真情躬自  
於積牘中窮搜累日乃得舊按范果無與亦得  
從赦例訐者伏辜又力辨漳州下海四十七人  
成獄具有徵驗赴都堂稟白都御史陳公難之  
公正色曰

朝廷以海濱之民亂法私構番國為邊患故嚴  
加禁治苟失其實枉陷無辜非

朝廷意也陳首肯速公具奏牘詰旦入奏  
聖明俞允俱獲釋免又承

命料檢內帑與同事者爭訐法司驗案逮問承  
役供事者衆公以一身當之而不及其餘遂坐  
輸得磚河驛永樂己丑

車駕巡守北京思用舊臣俾公鄉選擇疏名以  
聞公與馬驛召至京復御史職乙未巡案北京  
坐累左遷至交趾清潭縣事交趾新附賦役未

均持權怙勢者率多翼蔽公無所顧忌一以法  
折之邊氓雖甚德公而媚嫉亦多己亥丁母憂  
邑民泣留不可得服闋調江西之南康邑政號  
煩剗民俗強悍比年撫字失人醞成悖戾之風  
充糧里役者足跡未嘗至縣門公視篆之初召  
鄉老諭之以法理傳相告語翕然從化勾稽期  
會片紙數字民視之曰我父母手書也疾趨應  
命庶知民病莫重於弓賦田稅於是奏請得減

予賦之半均田稅於兼併之家民用悅服規為  
公立生祠峻拒而止又毀淫祠七娘廟掩捕妖  
人假葛洪廢井惑衆者於是風俗丕變而致治  
為之一新居邑僅三載

仁宗皇帝即位初元分遣重臣黜陟天下百司  
江右所隸七十餘縣藩臬暨府州縣官稱職者  
僅七人公其一也宣德己酉三考書取赴銓曹  
例陞二階公力以衰老辭於是致政之命時

年六十有五公狀貌瑰竒聲音鴻亮猶介特立  
少許可觸物或絃急霆震旋即陽春和煦藹然  
可挹以故人畏憚而靡有致怨者為文章豐潤  
興雅如其為人家居無事惟焚香危坐手書一  
編吟哦諷詠以自怡悅玩好之具未嘗屬意正  
統戊午八月二十四日以疾卒享壽七十有四  
娶樂清陳氏先公四十二年卒繼室童氏同邑  
人先公三十五年卒子男一先公七年卒女三

入壻解或王述蔡堅皆儒家子孫男四長即簡  
克紹家學領戊午鄉薦次篇籍筦孫女三曾孫  
男三簡等以今年十月十日奉柩葬于靖化鄉  
古竹里豐山之原嗚呼公以弘才正學當  
明盛之世任風紀長民社以行其素志所得可  
謂厚矣雖中更國踣而聲譽益彰所謂節愈挫  
而與厲公其有之優游晚景委順告終復何憾  
焉立碣墓道於制為宜爰掇大端而為之銘曰

仰矣徐宗久闕其逢發必顯融兮公入仕途  
張魏科使命光華兮象簡飛霜正氣方剛厥心  
允臧兮讞獄平反罔敢離艱守法不愆兮暨  
霜蹄旋復舊規益慎操持兮否泰相承民社是  
膺卓魯齊名兮仕止以時景迫桑榆獲遂懸車  
兮消遙林泉以終餘年形隨化遷鬱彼豐岑土  
厚水深宰木春陰兮勒名墓門慶及後昆永矢  
弗諼兮

拙訥葉先生墓誌銘

劉儼

黃岩有處士曰拙訥葉先生卒且葬嗣子原微以其門人蘭陽司訓應君志和所述行狀介武庫主事章君仲寅謁余銘章君且道先生之學精脩篤行上泝濂洛之淵源里俗為之不變於乎世有斯人耶使有之恨不能起之與遊銘奚可辭按狀先生諱尚輔字士勉拙訥其別號也其先閩人五季時避亂徙黃岩遂占籍焉六世

祖膾居州之米陳務曾大父養初贈江浙行樞密院經歷事見元翰林承旨潞國公張翥所撰墓銘大父道祐避地溫嶺隱德弗耀父希性號東澗學行並著邑志母陳氏先生生有異質夙抱大志凡厥猷為輒以古道自期其父家居教授先生承其淵源自得之學敦本黜末一以真知允蹈為務讀書以四書六經為本下及諸子百家之言靡不旁搜博覽以極其趣雖有疾病

不廢呻痛言雜莫之辯晚年益精於易清脩苦  
節造詣日深措諸行事惟義是從視世之紛華  
富貴漠然無所動於中此先生之學也事父母  
鞠恭盡瘁養志無違居喪葬祭及歲時奉先之  
儀一遵文公家禮事兄愛敬兼盡終始一致弟  
尚夫鰥且獨先生與之同居共食怡集終身命  
少子原紀為之嗣兄女少孤育之如己子既長  
具裝奩嫁為士人妻平居無惰容御下無疾言

遽色暇則端坐一室左圖右史雖盛暑衣冠不  
苟去身家法嚴正內外肅如也此先生學之驗  
於家者也其遇宗族姻黨歡然有恩察然有文  
不以踈遠而廢貧者周其急弱者植其生老而  
無居者迎以養之少而失學者收以教之葬其  
不能葬者十餘喪鄰里以急告亦賑恤之恐後  
先生居貧而好施予如此是以門徒雖衆而贊  
見之儀一毫不為已有衣廉食糲泊如也先生

師道尊嚴循循善誘名家右族不得師事之則  
有慚色擔簦負笈而來者戶屢可東先生答問  
亶亶皆隨其林而造就之凡經指授蒙品題者  
罔不思自激昂以拔於流俗至於接人禮恭而  
氣和語子以孝語弟以悌語居官者以忠愛語  
理家者以勤儉詞婉而確情真而懇翕然有足  
動人者雖有暴悍一接言動媿汗浹皆亦欲有  
以自新此先生學之施於人者也先生自少有

目嘗無意仕進屏去場屋之文大學中庸則集  
諸家之說而折衷之以資學者周易則采摭朱  
子語錄及黃超然通義之言可以相發明者附  
於本義繕錄未終而先生歿其稿多殘缺先生  
居喪時嘗節家禮之要行禮者便馬平生喜為  
古文詞一主於理典實雅贍有粟菽之味詩尤  
冲澹清逸追配古作者皆有稿藏于家此亦莫  
非先生學之所著也先生生洪武辛酉八月初

四日卒於宣德辛亥四月十八日享年五十有一配李氏子男四人長承基次承統早卒次源徽次源紀俱好學克世其業女二人皆適于士族卒之年十月廿三日甲寅葬于溫嶠山之原吁先生之學質而通博而要形於家族著於鄉邦彰彰若是使天永其年昌其施有功於斯世為何如耶孔子曰書云孝乎惟孝友于兄弟施於有政是亦為政先生其庶乎又何憾焉是宜

銘銘曰  
由晉書太  
晉書太  
五回  
半  
月  
六  
年  
來  
塵世紛紛名利途雞鳴而起爭奔趨先生視之猶泥塗歛迹不出恐沾汚俗學之弊陋且拘坐看大道生慕蕪先生義利分毫銖膏藏萬卷如石渠蘊為德行碩且膚卑不同俗高不迂發為文章德之符工不嫵媚光不枯天為吾道生真儒握瑜待賈而沽諸四方負笈來學徒坐擁臯比講唐虞身雖云晦道乃腴綿綿慶澤遺諸孤

嗚呼先生已矣夫有封若堂嶠之嶠貞珉深刻  
無媿辭過者必式瞻範模庶頑立懦敦薄夫

文章經筵徐先生墓碑銘

楊榮

正統己未仲冬之吉予方退自秘閣忽上海永  
蔣生文愷書上檄是邑庠訓導研狀其父徐先  
生行實一通懇其請銘生予通家子弟也因不  
辭而銘之按狀先生諱森字宗茂以字行其先  
山東臨朐人由晉唐宋簪組連延烜燁具載家

乘迨南宋時有為台之黃岩令者諱千一生子  
榮娶清獻杜公之孫女遂買宅居於邑之西橋  
里占籍為邑人令後遷奉禮郎太常寺簿卒於  
官而返葬于是榮生已仕元為樞密院經歷娶  
邑南孝順巷郭氏子諱存復為是院都事配車  
氏封宜人子三人先生居次長諱屋字宗實夙  
蘊經綸之具有憂天下之心應官至嘉議大夫  
兵部侍郎立朝多所建明事具門人少保黃淮

所撰墓表先生天資穎特有大志年十五善屬  
文自幼酷肖其兄而學則過之博究群經旁及  
子史百氏靡不淹貫嘗篝灯夜讀漢書一帙被  
落燼爇半折緝默填補之後得別本校之不誤  
一字尤深造於易閒居背誦終卷不遺一言切  
自嘆曰理數之曠天人之妙俱盡於是矣至聞  
永嘉史公文璣之學得紫陽之傳竟與兄往侍  
相質難史公竒其才不以師道自居而以友遇

之則曰昔所謂東甌二徐者今復見之遂呼為  
後二徐由是不一于博而克會于至一之約焉  
抑其性行清峻而恭信孝友而姍卹顧王氏張  
氏二婺姊撫諸甥棊然食之教之底于有成  
當時文墨之士來造詣者論議商確淬厲獎誘  
莫不心服脫匪其人以偶會則因問而答無復  
有所語其他善善惡惡上義下利皆此類也夫  
學之既至將有志於世而元社已屋矣逮我

太祖高皇帝始設科取士即領鄉書發身佐教  
類上縣學斥邪詖明正教諸生成咸知振勵越二  
年丁內難服闋遷徐聞邑庠教諭條約嚴謹躬  
行率士所著易說及詩書禮記經義四書疑辨  
以授學者是以藉所造就登科第者彬彬輩出  
諸藩重臣仰之爭先聘主文衡獲赴之者則為  
慶幸求文者得一紙則為至寶時曹國李公學  
士三吾劉公特薦其才學老成可大用未幾召

入侍

講經筵詳闡古先聖王為治之要甚沃君心一  
時名公臣儒若曹公李公駙馬都尉梅公胡公  
尚書楊公皆所敬交資相講益  
上欲授以大任可時顧問忽遘瘋疾蠹墮二齒  
語音訛謬適侍郎在位謹奏曰徐茂是臣弟也  
臣已委身事

陛下矣故山先隴為乏守管乞垂

聖念放其還家莫蕪奉祭俾臣得紓是懷庶可  
以竭愚忠乃可其請

上嘆曰是儒乃命也遂令典教本邑而奉祭祀  
於是自西橋徙居石櫃里故今子孫在焉先生  
季弟宗原暨從弟宗顯才質亦異由太學生仕  
春官尚書主事世稱黃岩三鳳先生平生所著  
詩文夥甚流播江湖家因厄難存者萬一享年  
五十有五嬰氣疾終洪武三十四年九月十七

也生于元戊子正月十二日娶同里金氏水南  
徵士道原之仲女生子琿琿女一性孝友適西  
橋葛天正氏先生又室林氏生壻頗有父風孫  
男寧崑岩密善崇峻魏嶠壻孫女一適寧川王  
氏滂先生卒後六年戊子六月廿一日金氏亦  
逝琿忍死卜以是年十一月合葬于石佛山之  
原葬時遭家多故未遑謁銘塚上茲壻為令官  
深懼先德久而弗著故祈生丐銘予念曩為翰

林編修時正侍郎公秉政之日曾熟瞻其儀表  
矣今稱先生酷肖之則其槩可想也矧獲觀其  
其行實之詳實宜銘之烏可以弗銘乎銘曰  
惟性之精勤學博而教惟行之孝嫻德謹而恂  
蚤覲

楓宸嘗以聖賢之治沃其

君夫既合而既親則遂處之于要柰二齒遽離  
乎齟齬而致位之不尊抱道之真止淑諸人薦

之者雖頻而竟以是終厥身蓋非其生之不振  
實命之速嗚呼太史銘墳百世弗湮亦足以永  
其令聞

故全歸應先生墓碣銘 彭時

封江西按察司僉事黃岩全歸應先生年百歲  
以成化丁亥十月十六日卒于正寢既葬黃輿  
山之原其子湖廣按察司副使欽以族兄番易  
教諭志和所為狀來拜請銘以碣諸墓欽嘗由

御史僉江西按察司事吾素知其賢也可推而  
知其父矣銘其奚辭按狀先生諱宗諤字尚節  
應氏為邑著姓其先自永康徙晉觀陽烈侯詹  
之後也六世祖諱武登宋淳熙丁未進士第仕  
至大諫侍講緝熙殿贈少師少師從子恕與朱  
文公先生遊倡明道學曾大父諱肖翁元黃岩  
州學正大父諱虎不仕父諱大賓監山西太原  
稅毋王氏元浙江行中書省郎中玉之女先生

幼凝重明睿稍長嗜問學善屬文鄉先生明承  
趙公司訓邑庠見而異之選補弟子負由是益  
勵於學宏中肆外迥出儕輩洪武己卯以書經  
領鄉薦卒業太學永樂改元監稅公朝會  
闕下上疏引年不報先生篤念親年幾耄不可  
遠役即日陳情乞以身代  
制可之監稅公遂致政還先生領職往蒞事惟  
謹未幾用知者薦陞谷藩教授職繫導輔悉力

規正凡政拂典章必犯顏爭之或形于章疏禍  
福非所計也永樂庚寅丁內艱調官山東登州  
府學未幾谷庶人坐不軌廢搜羅前後官屬咸  
抵罪先生獨以<sub>一</sub>免丁酉又以外艱改直隸廣  
平府秩滿遷徽州休寧縣學諭平生教人必先  
德行而後詞藝凡及門者各隨其材造就之嘗  
典山東江西文衡所取多名士正統戊午年滿  
七十遂赴京乞歸老題其所居室曰全歸以著

志人咸稱為全歸先生云先生雖高年精神氣  
力不少衰日坐閤塾如古父師攷德問業者咸  
歸焉客至延欸笑談語臣以忠語子以孝語弟  
以悌且根據古今出入經史聽者唯唯佩服不  
忘既耄耄猶不廢緝簡手輯先世遺文題曰世  
德錄命子欽繡梓以傳平生製作有淵然稿若  
千卷前後遊宦踰四十年一險夷齊得喪惟盡  
諸已而已至於濟人利物惟恐後天順丁丑以

欽貴

封陝西道監察御史後進奉政大夫脩政庶尹  
江西按察司僉事

命下而公逝矣聞者莫不悲悼大夫士私謚之  
曰文莊先生生于洪武己酉十二月九日娶新  
塘林氏早卒贈宜人繼李氏山東登州表之女  
封孺人加封宜人恭肅慈惠內政謹肅教諸子  
有法待族屬有恩先生得其助居多後先生八

年卒享年八十有七祔于先生之兆子男六人  
長闔林出次闔次即欽次廣平徐州學正次祐  
壬午鄉貢士次休寧俱李出也女三人嚴與張  
儀蔡陽陳譚石櫃金璘其壻也孫男十六人女  
四人曾孫男十四人女二人嗚呼先生端莊清  
介篤於忠孝明哲保身躋乎上壽信乎其全歸  
矣世豈多見哉是宜銘銘曰  
人之大節曰忠曰孝學失其傳孰知允蹈備哉

先生正學是宗動循軌轍克孝克忠筮仕方亨  
念親勞勩慕爾完職乞以身代

帝嘉爾孝爾親其歸爰往蒞事罔敢或隳聿以  
薦起教授王國弼直惟寅矢殫厥職乖政亂典  
憂心忡忡直言抗疏蹇蹇匪躬大節既完天錫  
繁祉全而歸之曷不寧止且覃遺澤施及子孫  
繩繩科第慶衍德門黃奧之原世奠瑩域太  
史琢辭來者是式

松塢黃公墓表

商輅

公諱禮遐字尚斌姓黃氏別號松塢故兵部職  
方主事彥俊之父今吏部文選郎中孔昭之祖  
卒且葬已二十年矣孔昭懼潛德或泯特具事  
狀徵予為表將刻石墓道以圖弗朽按黃氏世  
家台郡之黃巖今屬新分太平縣所謂洞黃之  
族徙自閩昭武鎮都監緒至公十有四世衣冠  
禮義視他族為盛人因以洞黃稱之公高祖軻

曾祖文質祖德深皆號長者德深兄弟尤篤友  
愛嘗扁所居樓曰集怡一時士夫多詩文美之  
考與主敦厚信實縉紳推許妣金氏繼葉氏俱  
有賢行公天性明達讀書不為辭章之習於聖  
賢嘉言善行記誦不忘思欲以身體之弱寇出  
應門戶公私規畫具有條理而弗以煩於父兄  
諸弟治家取衣食僅足有餘悉以為教子之需  
諸子既長有倦於學者即勅使歸田曰四民之

業惟士與農外此皆逐末非黃氏子孫所當務  
也臨財一無所苟嘗買紙於市誤與過多覺而  
還之戒從者弗言曰彼所得無幾知為我見將  
終身懷慚矣家人貿易歸未嘗較其物之美惡  
與價之多寡但曰好好子孫或為升斗所贏以  
求利者輒斥之曰爾曷弗留有餘以遺爾子孫  
乎公家教甚嚴待人甚恕鄉閭中事有不平皆  
取決於公至斗斛權度之微亦必以公為准蓋

其存心剛介是是非非一斷於理人皆敬而信之邑大夫鄉飲每虛賓席以請力辭不赴職方在任時例九載始得推恩因累辭薦擢冀得賜封於君而以疾卒公聞訃哭之曰壽天命也况能盡心職業即顯揚在是曷以封為自是十餘年益強健康和天順戊寅閏二月乙丑無疾而終晚歲好讀通鑑綱目至奸臣賊子事必掩卷喟不絕口未卒前一日猶手一編坐松下展讀

不倦距生洪武戊午七月二十三日壽八十一娶葉氏繼葉氏祝氏皆有婦德子男八長瑜為里社師號桃溪居士先卒次瑜即孝俊正統丙辰進士歷官有聲後以子孔昭貴贈奉訓大夫吏部員外郎次寶次琬次瓏次璵次璣次遂邑庠生女一適許韶孫男三十二長品次曜即孔昭天順庚辰進士歷主事員外郎郎中清才卓識燁然著稱於時其遠大未量次暝暄昊

赤城後集卷之二十三  
十一  
朕昂昇照暄昊晉曠矚眼昞昂瞰矚昊昉旦會  
睽歆昌喚矚邑庠生睨煦肺哨女四一適金鳳  
一適吳行實二在室曾孫男二十三女六玄孫  
男四公墓在金字山之原先葉氏祔焉孔子論  
質之近仁以剛為首嘗曰吾未見剛者或曰申  
枨曰枨也慾焉得剛夫仁則必剛剛則不屈於  
物若公剛介有守豈非仁者乎仁者必有後是  
宜子孫衆盛顯榮光大如火然泉達由是觀之  
公身後之福殆未艾也予故表於其墓

赤城後集卷之二十三終

赤城後集卷之二十四

謝孝子墓表

李東陽

成周賓興以孝友睦婣任恤漢舉孝廉舉孝弟  
力田唐舉孝弟德藝皆先乎孝孝者百行之首  
也故舉于國足以成化居于鄉亦足以表里厲  
俗及其沒也或著簡冊播轂歌刻金石以貽來  
者其為天下益豈細故哉予辱與翰林侍講黃  
岩謝公鳴治游進識其季父知寶慶府世修甫

獲觀家乘得其先孝子公於慶實為曾祖於侍講  
為高祖諱溫良字伯遜幼失怙事母陳愉惋不  
離側元至正間知昌國州事王谷英禮致之母  
病癥孝子丹左股肉作糜以進遂瘡國初盜發  
蘭秀山天兵出州人悉避匿谿谷孝子抱病母  
獨不去帥義而釋之孝子躬負母還黃巖復往  
取橐道夢母盛飾占曰不祥亟捐貲倍道歸母  
復病痿孝子夙夜扶掖踰一紀不少懈藝蔬供

母每糞必束其莖葉使不穢風日暄暖則負母  
出遊母嘗腦痛孝子方熨抑牀側知饒陽縣郭  
德茂與客訪之久不出有訝者郭曰使吾為茅  
季偉客顧不厚邗母沒孝子廬墓左十年乃返洪  
武末以孝廉舉

高皇帝親召問言多稱

旨賜楮幣俾供祀事期還而官之比抵家以疾  
卒年五十有八葬杜家山于四雍立固滋孫十

有一性全贈南京兵部員外郎曾孫三十有六  
世衍封翰林院編修玄孫六十有一孝子之卒  
也草屋陸修正有傳

伊府紀善鮑原弘有敘饒陽孫端朝為著逸事  
諸大夫士析為八行皆有詩序者謂割股固難  
事然未必死不避難有死道難於割股至眠食  
居起累歲如一日非倉卒義激者難於不避難  
逸事稱有母赴家及潔蔬供養侍疾忘客雖細

故庸行實人所難使孝子徒有此而無他異則  
世未必傳用是為孝子辨且為俗慨他如割股  
廬墓一事諸詩以是非枉直為說者尤多予謂  
善無大小無難與易惟在乎誠誠則隨所履踐  
皆為實者使矯彊為能藻飾為華雖極奇備衆  
亦卒歸之偽而已謝孝子之行歷險夷一常變  
未始少遺其親此其志誠出衷腑必自盡之為  
慊非徇名博利苟有所激者之為也雖特具一

節亦不害為孝矧其行之備如此哉古稱孝通神明誠格天地此理固然孝子雖際

盛明錄而弗用然再世復乃益蕃碩以文章德業顯于世未艾也彼誠於善者固不俟勸而後作然亦詎非疆善之一助哉是鼓歌簡冊回天下所不可闕而亦奚以多議為也孝千家居時拾遺囊竿之道傍以俟遺者容昌國時見癩者頽葬于水迫令還療而活之此二事實慶聞厥

考負外公言嘗自著遺狀于家因附著焉

文貞先上應君墓誌銘 黃淮

余謝病歸曰未久也鄰邑逢掖之士應君尚履蔡君玄开介乘成魯敬來謁余喜有得朋之樂促席劇談應君各問若建瓴蔡君亦彬彬雅飭款留數日別去正統戊午春應君攜從子志和門人盧爵復來惠訪適余屏處山庵泛舟運造挾族譜徵余序留三宿而夙疾作蹙尔言歸疾

稍間馳書抵余論作記之法余擬答未發也而君之訃至矣嗚呼痛哉夫何奪吾良友若是之速也玄厓之子斬亦君之門人偕盧爵奉君從兄教授諤所述行狀來請銘其墓義不可辭於是反袂拭淚次第其事而銘諸君諱宗祥尚履其字也天資穎異幼即屹然有巨志其讀書積卒也卷涉日輒成誦以故卒博而彊記未及紀鼓吻卒吟時出驚人語鄉長老如伯真徐公大

昌余公皆優禮獎掖稱為小友稍長從明師辨質淬礪恒以古道自期夜誦率至四鼓疑有未釋遂達旦不寐或苦於睡魔則懸髻床屏以示警父母憂其夙抱羸疾禁止之稍輟而復讀自壯至老益肆力真搜發為文章抑揚開闔隨意所至要其歸一本於理詩尤勁麗古雅不自貶以趨世好其處已應務也宅心夷曠制行峻潔紛華貨利淡無所營麤衣糲飯裕如也家貧親

老設帳授徒以供滫瀡父耄老服食卧起身任其勞遇宗族篤於義先世田廬讓而弗較與人交傾心吐膽不設町畦亦不阿意苟容善則稱揚過則規諷即有所拂逆未嘗有变色識鑒尤精確人之臧否得喪舉不能遁其情其出處大節也永樂間嘗從邑庠諸生游而厭為科場文至有南轅北轍之相戾於是拂袖而歸搆溪南書屋于澧川之上號兼山山人以見志遠近負

笈而至者日益衆隨其所業剖析精微弗明弗錯暇則危坐一室左圖右史薰爐茗碗悠然自得客至款語終日率關乎世教而和氣充溢可挹名門大族設行窩延致亦忻然赴之貴流雅士過其里多來就見邑之賢大夫嘗遇以賓師之禮屬修郡邑志延就筆削懇懇致力禮部中中孫原貞親臨程督尤加敬愛朋舊在顯位者薦剡交至俱以疾辭語人曰吾非薄功名而不

未城後集卷二十四 六  
為也吾命分所安寧捨己以徇人耶好遊覽名  
山勝境追訪古人遺跡間嘗一抵金陵後再遊  
錢塘而歸皆有紀行之集生平數困於疾未嘗  
以疾而廢業己未冬十一月疾作呼諸子謂曰  
吾病殆不能支然未可戚吾父吾瞑目後若等  
當竭力致養庶可少紓終天之憾詰旦族姻故  
舊咸來候安否起擁衾坐口占一律以謝音節  
意趣不異平昔諸弟子嗚咽出涕諭曰生寄死

歸茲理之常幸自勉以圖樹立哀傷無益也反  
席未安而卒若翁臨視哭之慟聞者莫不悲慘  
是月之望也計其歷年僅五十有六羣弟子痛  
念其師學弗究其施相與稽諸輿論士有易名  
著于禮經畧倣貞曜故事私謚曰文貞昭厥志  
也君之系序出自晉觀陽烈侯唐宋初曰宗翰  
者由永康徙居黃岩三傳至武仕至大諫侍講  
緝熙殿卒贈少師又五傳至諱泰亨者君之高

祖也曾祖諱肖翁元黃巖州學正祖諱虞紹興  
路蘭亭書院山長知元將亡謝事遷家父濟賓  
隱居自佚年八十有五壽考康強耒艾也母王  
氏早亡配同邑大澧潘氏善理內政亦先卒子  
男三闡闡嫡出周庶出卒之明年十月十二日  
葬于白浦山之原銘曰

玉蘊于璞兮其光燁如匪雕匪琢兮完質以歸  
養弗克終兮數不可違令名永垂兮人孰與俱

溪南之山兮龍虎趨安此吉壤兮慶有餘大書  
深刻兮慰我遐思靈或感舊兮寧不一瞬而嗟  
咨

明故處士謝公墓表 李東陽

有孝子之孫節婦之夫曰處士謝公諱乾字性  
端台州黃巖人也孝子諱伯遜嘗割股愈母疾  
奉母避極勤苦鄉以孝稱孝稱子原睦有隱德  
寔生公公讀書識大義與鄉名士陸脩正鮑原

弘湯朝宗為文字友陸貧甚公特置執禮之終  
其身及其子猶然公性剛峭與人寡合遇事不  
可輒面折不曲為假借竟以是得禍卒年三十  
有一而已節婦趙氏出宋宗室裔歸于公生一  
男甫晬二女皆幼公卒時節婦年二十有九有  
奪其志者節婦聞之斷髮自誓謀稍沮節婦嘆  
曰彼所利者財爾財不去禍終未殄乃盛奩具  
以嫁夫之幼妹曰是固吾所厚者聞人有貧乏

及橋梁道路當葺治者因以給之數年貧亦衰  
外議始息年七十有三乃卒媵嚴閨者少節婦  
十歲節婦初寡憐其少欲嫁之嚴泣曰閨兒獨  
非人哉卒不去後節婦十有七年卒人尤異之  
曰節婦之能範其家如此公子世行有子五鐸  
鏡鑄鑑銳鐸舉進士歷翰林編修侍講以編修  
貴馳父

封侍講君既壯鄉大父行已少不能悉公行節

婦之存也猶及見焉時有司欲以節婦事上節婦聞之辭既沒例又不得旌然鄉之人皆稱為節婦無異詞夫人之有德惠節義必尊官重地大行而顯施或不幸而涉患歷難出乎人之所不能為者其名乃著然德在身而安危窮達繫乎時故天下未嘗無德而鮮有名古之臣稱咎夔逢干以婦稱者非太任后妃則共姜之徒也其間淪沒而不傳者豈少哉故名者君子有之

而非所賴以為賢也謝氏之孝以疾病離亂著節以孤養著皆出乎所不幸不然則閭閻閭壺之間蓋亦難乎其為名矣若處士公生治世未嘗顯仕非託乎所謂孝與節者雖賢孰得而知之哉然婦之道無成有終其在家教有不得而專者予於節婦蓋益見處士公之賢然亦以微孝子之教未泯也論君子之澤者必以五世世世而承之則可以至於無窮今謝氏自孝子而

降五世矣節婦之後僅三世而侍講君出焉文章行誼之懿固若是盛也今使天下論東南世族知有謝氏之孝與節者自君而益著則所以延休紹祉引于無窮者當不自今日始耶予與君同擢第入翰林麗澤厚且久其家教世澤類能言之節婦既合葬之二十有三年君將刻石墓道以遺子若孫謂予宜為文謹備述節婦事源厥德源以著處士之行作墓表

夫南贈兵部武選員外郎謝公墓表 徐有貞  
謝以國氏其先蓋申伯之苗裔也台黃巖之謝由會稽遷以宋季也其始遷者諱鞅公世系之所自出也  
國初有諱伯遜者居學養親其行幾如古之高季以孝廉舉未及官而卒台人稱為謝孝子公之祖也孝廉生諱原叅者號泉石翁其行如孝廉公之槩也翁嘗與儒者故丹陽司訓東廣陳

子俊遇於旅次于俊以白金二百兩寄翁所而  
他適會公病使人追子俊而歸之金子俊怪之  
曰我既託翁何遽歸我哉翁曰我平生所守惟  
信義忍一旦溘先朝露不得手相付則負歉於  
冥漠矣此翁行之一事也故內翰曾子棨為之  
志以傳于後翁所生有八人公其第二子也庭  
奎其諱也性全其字也友松其別號也奉訓大  
夫南京兵部武選清吏司員外郎其贈官之階

也 國之恩典以其子省之能官而推錫也公  
之行如泉石翁初翁以剛介不容於鄉群少為  
所誣構而逮至 京師公時方弱冠奮與其兄  
性高弟性玉奔走救馬繇應寒暑心怒肌腊足  
齟而弗休竟白其誣而奉父以還公嘗請於其  
父立家範五十餘條依司馬程朱氏遺規將俾  
其子姓有所持楮父悅而從之乃命性高應門  
戶性玉接賓客而家政以公綜理焉不幸父兄

續後集卷二十四  
繼沒而其下諸季寢圖分異公輒泣止之不從也乃盡出其產而語之曰夫是產也義不可析也而析之我何忍與哉必不得已惟伯氏叔氏於先君之患難也致力為多宜加厚者乃以十之四畀性高諸孤以十之三畀性玉餘則均之諸季而無一毫自私焉此其行之槩見者也家桃溪之上庭有古松公每撫松盤桓吟哦自得  
有陶靖節之趣焉故其以友松自號而人亦從

而號之也公兩娶皆陳氏也元配先卒贈宜人繼配今封太宜人其命階皆以子省之貴也子有四皆先宜人出也其長即省也次復也次績也次庶出濟也女曰如山樂成程世特其壻也孫有四振聲也振彩也振文也振傑也洪武丙午六月之四公生之日也景泰甲戌正月之十三公卒之日也乙亥十月之二十一公葬之日也其邑飛鶴山之原公葬之地也奉襄事者子

省也狀其事行以請書于太史者奉議大夫秋  
官郎中高瑛廷璧也君子謂謝氏世積德宋元  
遠矣自之曰公生之曰景泰甲戌五月  
國朝來孝廉泉石暨友松亦已三世博行孝義  
而皆以隱約終報施之理幾無徵焉至是而省  
乃第進士有官于朝有守與為駸駸顯融績  
且以學繼起其家之慶方來而未已也夫豈人  
為之致哉盖天之報善其有可徵而不爽也乃

按狀以書而表于其墓後之考德者尚有徵於  
斯也

涿州同知張公墓誌銘 葉恩

吾鄉之黃岩有慎脩潔行之士曰張君諱璣字  
士璇邑之澧川士族曾祖諱鏞元贈淮安路總  
管府經歷曾祖妣章氏贈恭人祖諱元芷累官  
至忠顯校尉平陽州同知祖妣李氏封恭人父  
諱旦隱居不仕母陳氏繼徐氏生君甫四月而

赤城後集卷二十四  
孤撫君成人繫徐氏是賴君天資穎悟嗜學性  
至孝伯父世儒鍾愛之遣從名師執經問難無  
虛日洪武庚午以俊秀選入邑庠弟子員時鄉  
先輩迂菴徐先生尚古趙先生實司教職君朝  
夕親炙講明義理尤工於詩愛鍾王法帖習之  
老而不倦永樂乙未應春貢登

南京胄監朝莖暮鹽辛勤學業二十餘年宣德  
庚戌試事于大理越明年授定州同知未幾丁

內艱歸服闋調涿州正統乙丑九載秩滿致仕  
歸乃幅巾杖屨逍遙里閭者十有五年生於洪  
武癸丑八月二十日卒於景泰乙亥十二月初  
三日享年八十有四元配謝氏繼韓氏俱先卒  
合葬于本里百峯金山之原子男七人與泰與  
吉與新與革任深州訓導與郁與祿俱先卒所  
存與尺一人孫男三人挺遁理狀之所述者如  
是予以晚生與君為忘年交君登胄監時予始

入學已聞君之學行未嘗識面暨承乏刑部君  
歷試棘寺一見傾蓋如舊蓋薰然和樂君子也  
每與評詩論文去取切當理趣精詣有足起發  
者宣德壬子予奉使過定州謁君廨舍中清儉  
自持蕭然如僧舍隸兵胥吏仰之若慈母不聞  
叱咤聲適伊姪疇以上舍生來會連日聚首笑  
語殺羞真率於疇亦無可贈恬然無愧後移涿  
州所守一如定州不少易志涿乃密邇京畿顯

宦權貴往來旁午或有所饋以取悅希進君若  
不聞尋以定州所歷經九載秩滿吏民將訴留  
之居以年幾七旬禮當致仕遂力辭以歸內顧  
田廬荒落子鮮孫穉無以為生處之晏如季子  
與尺年甫弱寇詢知予辱交其父乃具狀踵門  
以墓銘為請計君卒之時與尺之伯仲六人俱  
先故乃父往事與尺尚穉未能記憶狀不能備  
予故述予之所知君者併書于前而銘之于後

云銘曰

一和如春一清如水居官去官始終一軌伯夷  
之徒展禽之似紛紛饕餮聞之頽泚仁者宜後  
盍昌厥嗣如或未然刻銘以俟

兵部主事章君墓銘

劉定之

君諱陔字仲寅姓章氏世居台郡黃巖曾大父  
國材不仕大父日孜

國初舉明經試禮部主事父子良以君貴

贈兵部主事母鄭繼母戴皆

贈安人君幼穎悟日誦數千言以書經學領浙

江鄉薦名在第二時猶未冠也主司為加冠于

藩省之堂歌鹿鳴以命醮歸家益肆力于學又

數年始上春官令少傅冢宰王公少保學士陳

公較其文名又在第二

廷試亦高等授禮部主客主事未幾以疾請假  
歸里君早孤事其伯父若父撫誨其諸弟尤篤

未仕時鄉俊秀多執經問難既歸藥物有間日  
從事於敬順友愛授業解惑以故其弟唐舉于  
鄉得乙榜今為長汀教諭鄉後進亦多發聞大  
率君力也鄰藩江右連科聘君典文衡取舍公  
明衆論諧愜於是君居家歲久矣蕭然林下無  
復榮進念而士大夫多謂君材猷方嚮用不宜  
投置閒散屬

今上登極遂起君為兵部武庫主事武庫掌百

司僦從其多寡異數貧富異地得以視時勢為  
背向或操其奇贏以自入以故居焉者志甚得  
人亦多向慕之君獨恬寂歛退羸馬陋宅如曩  
昔遇古今書會意處解頤肯首快讀急錄若恐  
不及公退為其從游者章剖句析削稿正誤無  
倦色景泰甲戌同考會試得士彌衆明年  
上命儒臣修宋元史續朱子綱目君被薦與其  
事一夕歸自史館猶然炬閱書久之乃寢中夜

卒時十月二十一日也距其生永樂己丑正月  
八日得年四十有七君別號約齋配任氏封安  
人子男三人奎晃紀女一人在室孫男一卜以  
卒之明年葬黃輿山嗚呼君可謂篤學清脩君  
子也己予始赴春官與君相遇於廣陵兩舟街  
尾行朝夕會言揭曉聯名敘交漸篤泊君三為  
試官而予仲弟長子相次出榜下以門生禮拜  
君蓋可謂有世契矣晃以春坊清紀鮑君廷贊  
所述事狀來請銘詛不獲辭乃序而銘曰  
已乎約齋亦既逢時蔽實相符政學兼施其所  
短者不享耄耆以大其用鏗錡赫熹豈不有後  
遺經載筭蓄而發之尚其在茲

吏部郎中林公行述

應志和

公諱福沛更諱璧字貴璧別號無逸姓林氏其  
先閩之赤岸人五季時有太平三府君避亂來  
居台黃岩之泉溪遂占籍焉族久益大以衍人

稱泉溪林氏今隸太平曾大父彥文大父畊民  
皆業儒不仕父從哲以公貴累贈奉政大夫南  
京吏部考功清吏司郎中母朱氏贈宜人公自  
少穎異絕人風神明秀讀書再過輒成誦不忘  
父異之私語所親曰是子殆昌吾家者乎然不  
可無教養之功也故雖甚愛之而程督其業不  
少貸不幸早失怙恃且時罹多故先業以之日  
落於是授徒里塾資束脩為歲計益刻志問學

時族父良齋樵山及鄉先生戴有南講明四書  
有深委公日登其門質疑問難深契其旨隱然  
名起士林後又從翰林檢討同郡陳公璩受毛  
氏詩兼肆力百氏之籍發為文辭浩瀚奔放一  
主於理陳公嘆曰有用器也因勸舉進士公初  
薦為己之學無仕進意至是始稍為舉子業宣  
德己酉以儒士中浙江鄉試第六正統丙辰會  
試禮部亦中前列俱有文刻于錄廷試擢進士

第五人名動京師閣老少傳楊公榮延致于家  
俾諸孫受業焉丁巳除禮部精繕司主事授承  
德郎戊午出使廣東所經有司各以土宜致饋  
輒斥去

詔裁減教官之逾舊制者公循例還家三孤楊  
公士奇楊公榮楊公溥尚書王公直侍郎王公  
士嘉少卿沈公璟學士錢公習禮曾公鶴齡編  
修劉公定之皆贈以言致期待意甚厚辛酉主

江西文衡人服其公若內閣少保彭公時都御  
史羅公麓侍郎陳公宜布政使丘公高皆其所  
取士也甲子

詔至京調禮部祠祭司主事每當  
郊廟大祭祀必齋肅竭誠以蒞厥事天下僧之  
受度禮部者祠祭主之每三歲一度官受其賂  
者多致富公兩度僧秋毫無所取甚為大宗伯  
胡公澐所重嘗署其考曰學優而正行端而廉

秉直不阿允稱厥職見者皆以為非溢美云景  
泰二年秩滿陞南京吏部考功郎中授奉政大  
夫勤謹廉介如在祠祭時考劾黜陟守主於公  
天順二年幾再考以末疾謝事歸棲遲枕席者  
六載以七年十二月十六日卒距生之年癸酉  
四月廿日享年七十有一明年十二月丁酉葬  
所居里管監山之原公敦孝友慎交結存心制  
行介潔端莊一以不欺為本少事父母能得其

歡心年踰四十始仕恒以祿不逮養為恨歲時  
祭祀未嘗不感慕流涕仲氏貧不能自存割田  
贍之終其身初家食時以詩贄見少保分庵黃  
公准于永嘉里第與語大奇之為公題詩梅花  
卷以致意焉正統己巳分庵薨公奉

命賜祭并督有司治葬事靡不用其情嫉惡素  
嚴見人不善若將免已去而不之顧遇知己輒  
傾倒無町畦尤薄於利非其義取予雖一芥不

苟居官二十餘禩位列于大夫而家無餘貲泊  
然布素如寒士殆所謂以清白遺子孫者歟年  
既高而嗜學不厭公退手不釋卷澄心玩味透  
徹底蘊凡異說亂真者必明辨而痛闢之喜吟  
詩一宗李杜多驚人語人傳誦不輟臨終之歲  
猶為絕句百餘首以示子孫其所著詩文如于  
卷藏于家配李氏封宜人有賢行與公生同歲  
壽康未艾子二人長錫腔次錫寵俱以學行世  
其家孫男六人長葩早卒次世冕為邑庠生庸  
敏嗜學次義次茗次董次藹董亦天女四人蔣  
匡潘律鍾景其婿也最少者許嫁而亡一日其  
孤錫腔來告予曰先人葬也久懼先德無托以  
傳敢以狀為請予獲公甚久最相知遂不辭而  
擬其出處行實可以昭示後人者論次如右以  
為他日問銘之左驗云

赤城後集卷之二十四終

其出處實有以昭示於人者論其功也  
 則類以水為諸子蘇公甚之類賦遂不賴而  
 其出處實有以昭示於人者論其功也  
 則類以水為諸子蘇公甚之類賦遂不賴而  
 其出處實有以昭示於人者論其功也  
 則類以水為諸子蘇公甚之類賦遂不賴而

赤城後集卷之二十五

兵部主事黃君墓誌銘 陳循

黃之先本閩人其為台之黃巖洞山人自五代  
 昭武鎮都監諱緒始彥俊十五世祖也自是居  
 洞山皆黃氏人因稱為洞黃宋累官至治粟都  
 尉諱禎舉博學弘詞擢太子洗馬諱仍元判泉  
 州諱智彥俊十世九世七世祖也子安谷時尚  
 斌彥俊之曾祖祖父也皆有隱德祖尤讀書好

古善兄弟至建集怡樓父以素履端直為鄉邑  
所倚信母葉氏生瑾瑜寶葉氏性貞淑有婦德  
早喪繼母祝氏生瓏璫其琬璵皆庶出兄弟  
八人彥俊行二諱瑜彥俊其字也號慎齋自幼  
體貌豐偉負英氣耻與群兒伍稍長從鄉先生  
程德克游每聽德克講授輒領其要或有所辨  
質不窮極底裏不止為詩文雖成之不難然非  
沈思終日痛有所削不足以滿其意嘗曰古稱

言不文不足以傳遠雖吾輩所作亦不可苟也  
識者以為有志之士宣德己酉以詩經領鄉薦  
正統丙辰余考禮部會試得士百人而彥俊在  
選列廷試蒙賜進士出身即奉使廣西賞勞  
將士大起才譽使還未幾擢授兵部職方主事  
兵部四屬惟職方最煩劇重以清軍政興御史  
自四方送至者日不下千百人稱冤者眾而真  
偽恒相半彥俊一究得其情冤者得伸而詐

者不得遂其私又嘗用今尚書鄺公之薦奉  
命選兵四川助征麓賊兵之壯銳咸懷以賄求  
免聞彥俊風沮然罷念所簡凡數萬人皆其驍  
勇出群者也肆成功者多所賴焉所過名勝咸  
有紀詠歸以示其相知者曰吾行川蜀私所得  
盡在是子可謂不富乎其超邁率類此大臣每  
薦屬補外輒欲及彥俊輒辭謝曰士之仕也固  
所以行其志然莫急於得祿養親而尤莫急於

得推恩榮及其親夫得祿為養鄙願畧遂矣榮  
及於親行有可望如俾不肖得遂此願惠莫大  
焉時得推恩及親者非一官滿九載不能而彥  
俊滿職方僅少期月薦者為止孰計其竟皆不  
哉古稱為善有必獲報之理而彥俊尚不足  
徵理胡可詰耶彥俊為人外和易而內敏直接  
人以禮而與物無忤喜濟人之急憫人之貧匱  
至於疾病死喪之事赴之尤惓惓焉其生以永

樂乙酉四月十八日而卒以正統丙寅四月二十六日年四十有二配金氏有淑德與其子昇先彥俊歲餘相繼卒官所子男三長曜仲瞻昇其季也女一尚幼方彥俊未病時曜以歸其母及弟之喪歸黃岩至是自黃巖知父病來省及中途已聞訃又將奉柩歸與其母金合葬于里洞山之原而奉其執友兵部主事林灝所狀事行來求余銘嗚呼彥俊余所取士之尤良而屬

望之尤深者乃止於斯忍不為之銘耶銘曰噫嘻世往往有登隴而望左右以徼其非有卒大以壽操素履攜以歸夫天授雖他有可受謝而不就乃不足以久斯將安究詎非以貽厥後

博興知縣趙先生墓碑

黎淳

宋社既屋運改澤存其子孫柯分蔓引散處吳越久而成家益蕃以鉅吾以黃巖得其一支最盛者曰南隅趙氏馬南隅實徽宗子安康郡王

士悅之後士說仲子官黃岩愛山水竒勝因留  
寓今傳一十三世代有顯宦吾又於南隅得其  
一人最賢者曰珂字廷器焉廷器號慎軒學者  
稱為慎軒先生即先師也曾祖友諒以季子仲  
鼎貴贈工部員外郎祖季寧父同伏皆隱弗仕  
而同伏氣豪行危晚乃退脩括囊遠害且慕龐  
德公高致自號遺安產四男子先生仲也生而  
魁梧秀穎內服家教於親外求麗澤於友志文

志傑可愛弱冠補縣學生時翰林檢討陳公璫  
以詩學鳴於台弟子尊從甚衆先生私淑於人  
得日夜居黌舍講肄勤勵刻苦寒暑無間非節  
朔不一歸用是大有增進深造闡奧發為詞藻  
汪洋精粹無讓儒先洒為翰墨飄逸潤澤不慚  
古法而寫景述情之句記物序事之章論收述  
答之作秩然條理人傳誦起敬畏焉縣令周公  
旭鑑方虎視黃巖芟鋤強戾奮髯一怒群凶膽

落生徒震懾莫敢近獨稱先生忠厚有學加禮  
或邀致訪理道與飲酒歡洽終日浙藩督學憲  
僉花公潤生亦特器先生遠大凡考試之期踵  
門請教者塞路然揭榜輒弗利歸益自責增修  
舊業務底于成正統甲子經六試始登名明年  
舉進士乙科時已年踰四十人猶勸其卒業胄  
子先生曰古者四十強仕吾豈可不安命耶遂  
謁選天官授湖廣華容縣學教諭先是華容校

官類寡學黷貨以敗人蔑視如無鬻舍鞠為蔬  
園生徒老朽科第久乏先生始至碧梧翠竹之格  
和風甘雨之情通今博古之學已足動人加以  
詳言正色寬猛適中隨機應變以勸以感未逾  
月學者翕然歸向先生乃寢處齋舍會饌陞座  
集子衿且讀且講夜以繼日士風丕變歲丁卯  
華容仍乏科先生大懼別圖選授予時家居寡  
昧年已二十五先生言於督學憲僉韓公賜俾



原件短缺

具數縣學同諸生講肄勸懲怠程督加嚴景太  
庚午乃中六人曰董廷圭曰程萬里曰譙讚曰  
劉大朋曰雷時中曰陳伯良而廷圭發解焉癸  
酉又中二人曰雷浩曰劉希昂焉循無學有負  
逮先生滿任去始僥倖自此華容多材科第繼  
盛而劉大夏等又發解擢魁矣先生在學時堂  
齋制度煥然一新慶祀儀文井然備具憲僉韓  
公賜方伯蕭公暄薦於巡撫都憲李公實具疏

早必具告文禱社雨暘皆應不假緇黃田野闢  
闢鄉無惰農盜賊斂踪邑多富室乙酉滿九載  
獲免告訐將行藩臬交章保薦不果留士民耆  
稚攀恋遠送至今思之不置既來京師吏部謂  
先生終秩無過併錄前之荒政上陳得援例  
賜勅贈父同伏如子之官階文林郎博興知縣  
母胡氏贈孺人妻李氏封孺人蓋殊典也時先  
生曆過耳順功名之念已微既得予告歸展墓

即從容山水間以田園為樂不復有心仕宦又  
五年考終正寢其生永樂癸未二月初二日卒  
成化庚寅八月廿七日壽六十八李孺人先二  
月卒子男三人長明徽次明漢次明敷明敷為  
縣學生後三月亦卒女一適項崇光孫男十七  
人而克建顯昂顯梗顯本皆為縣學生已成材  
孫女二人後一年明徽等奉二柩合葬于委羽  
山先塋惟知師者莫如弟子淳觀先生之性溫

厚和平與人接春意藹然人樂與遊靡不信從  
先生之才明敏通暢優於治劇事雖積前叢脞  
而應酬恒有餘無少踈先生之學雖專詩以決  
科然若易與書皆能誦傳註夫於經既通傳註  
則致用必周况使先生得當大任而託天下國  
家之寄其事業必不止此惜乎年老而終耳彼  
立傳者淺略鄙陋乃謂先生但通一詩至擬諸  
卓魯而止此豈足以知先生哉銘曰

趙宗天潢分東越南隅有家綿綿瓜瓞先生  
挺生德厚流光才博而周學深以長模範楚人  
琢石成玉父母魯民消禍為福何以致茲惟竭  
一心特敬秉誠天實鑒臨教崇明師養茲賢令  
教養備全天篤餘慶瑤環瑜珥蘭茁其芽瀆源  
淵洪澤炳英華委羽之山合藏靈劔伐石琢辭  
太史謀行

鴻臚寺序班高公墓表

夏時正

景泰改元之三月十有七日鴻臚寺序班高公  
以國事死於邊年五十有五獲櫬歸葬于黃巖  
稠開里先君泉州經歷公之墓側其仲子四川  
按察使瑛乞翰林學士臨川王公英誌諸壙迨  
今三十餘年少子江西泰和尹璘復求時正以  
表墓嗚呼公之有子如此可為厥美而弗能泯  
者歟公諱昕字彥榮台之黃巖人其先世系令  
聞紀諸壙不復贅惟公敦柔信讓沈毅有謀孝

友出於天成禮範本諸先訓自少力學工文志  
取科第而尤精於法律經歷公永樂初被召卒  
于京公間闕奔喪來歸母安人周氏先喪咸哀  
毀踰禮殯葬竭誠慎事繼母撫幼弟克盡其情  
先在閩受知於方伯黃公澤因辟從事浙藩明  
達廉慎處事矩度方伯而下咸禮重之而公裕  
財能施會稽汪氏嘗坐事家無以贖公資白金  
若干得活給事中天台葉穎卒于官公捐資具

衾棺路費喪賴以歸其慷慨仗義率多類此而  
居家自奉泊如也正統己未既蒲考群試內庭  
擢第一階七品出身需次銓曹事忤權宦謫官  
大同時鎮守總兵定襄伯郭公登文武兼才難  
許可人聞公行能招與計事成中肯綮事以師  
禮已己英宗車駕留虜庭公不畏險進衣行在  
因覘虜情有寇蒂之賜景泰庚午以例罷去郭  
公力薦復之是秋虜復寇大同郭公問計公曰

虜懸騎深入利在速戰勢必不久我歛兵堅壁  
勿戰彼食盡無利必遁去則選輕騎躡其後襲  
之賊可傳首而至也已而賊果遁去公追至沙  
窩破之獲人馬無算有司以功聞陞鴻臚寺序  
班賞賚楮幣有加公益感淬礪督衆塹壕大同  
城外虜突至公與諸將士力戰却之中流矢旣  
還創甚踰日而卒天順丁丑以瑛勲贈南京刑  
部河南清吏司主事癸未加贈奉訓大夫

刑部廣東司員外郎配朱氏有賢行後公二十  
四年卒封太安人進封太宜人先是群職隨駕  
土木死者七品已上補子官賜祭於死所與凡  
前後死者與焉公九品不及階惟與群祭而已  
然二子聯登科第克有成德咸休光譽是亦勤  
事死國之報也嗚呼公有弘才而弗大於施公  
有顯績而弗久於位公有子祿而弗享於養身  
死國難而弗愧於心視彼偷生苟祿覩然而不

知耻者曾犬豕之弗若矣是宜光炳史筆名同  
日月垂英嚴於不朽也時正與公官同時自知  
公之履歷最詳且姻舊愛厚是用不腆之文書  
公之所知者歸焉不可以不銘銘曰  
士大節忠為先公殞身履險顛功浮食名矢鐫  
示昭報慶蔓延公之生庶無愆

頤庵葛君墓表

李匡

一鄉之中必有端謹孝德之士足以模範後進

而後鄉人有所慕效而化為善也俯仰今昔吾  
鄉能稱其實者惟徵士葛君殆庶幾乎君諱源  
永字希濟別號頤庵其先潤之丹陽人宋建炎  
間諱祐者仕知黃巖縣事卒于官子孫遂卜築  
邑東之東山以居六世祖諱元芝徙居今之西  
橋高祖諱彬元從仕即廣東宣尉使司都事曾  
祖諱復忠祖諱道彰會國難方殺力支弗墜父  
諱永年治經邑校齋志而沒少保永嘉黃公准

銘其墓德善備矣母同里徐氏儒學司訓茂之  
女兵部右侍郎公實之姨也清脩凝重婦道師  
焉君生而神清氣完言行不苟讀書必求古人  
之躬行實跡事父母色養不違處伉儷賓敬而  
不褻待諸弟則怡怡愉愉若宮商相宣而埙鳴  
箎應也鄉閭無少長必溫恭姬煦之為編戶長  
一毫不取諸人遇人貧不能食喪弗克舉者輒  
賙之濟之故舊有患難則力為排援又資助其

不給踈遠之親必敦其序總功之喪必製其服  
此皆人所難能而君優為之父病疴踰數月君  
食旨不甘日具湯藥侍左右衣帶不解蟻蟲叢  
生既沒擗踊叫號絕而復甦罷沐廢盥醢不入  
寢室者三年正統間貴溪周旭鑑來知縣事威  
嚴剛愎遇人少許可惟見君則置諸春風和氣  
之中以本縣學職薦不就已而直隸提學御史  
程富又以趙州學官缺員狀薦諸

朝黽勉而起一夕舟次淮上夢見母若不安春  
君即捨舟南歸母驚其忽至君具以告母曰吾  
於某日得疾恐不獲見汝而朝露齒臂悲鳴此  
豈有所感耶計淮上所夢之夕正與齒臂之夕  
符嗚呼母子相感之理一至此哉暨母沒居喪  
如嚴君之戚一日隣家燒地降種火逸流入牛  
牢時西風迅急延及正屋君撫棺籲天大慟東  
風轉火就滅棺幸無恙人皆謂孝感所致是日

君之姪存誠招予飲目擊其事非得於口耳之  
傳聞也次弟希澄仕歸德州學正不幸棄諸生  
歸旅櫬君臨棺哭之甚哀聲聞巷陌行道嗟傷  
次弟源滾源滉相繼先逝君哭之如學正不以  
老而少衰撫其遺孤如己子曾叔祖官翁死無  
後殯淺土四十餘年君撫其遺事撰誌卜地葬  
之娶栢山張氏厚資裝習美飾無驕矜之態修  
行婦道孝敬嫻睦靡不備至子男三人長模次

楫皆克家次稜補邑庠生女一適同里徐履道  
宦族也能讀書以世其家君享年五十有九卒  
於己卯八月二日安人生視君少四歲卒視君  
先一年合葬于三童鄉呂白洋先塋之側禮也  
嗚呼君之潛德懿行可以敦勵薄俗可以模範  
後進由是西橋上下方數十里雖田夫野婦皆  
知所以敦行孝弟君次五弟源湛於君之喪之  
葬亦如君之哭諸弟而加袒括焉予素重君德  
知後之必昌也故以季女侍稜之巾櫛今君不  
可見矣見夫稜寧不感慨而動于中乎故畧序  
平生行實表諸墓道使後人有所知焉

毅菴賈先生墓誌銘

杜寧

先生諱富字守信別號毅庵姓賈氏其先開封  
人蓋宋魏國文元公之裔始祖詔紹興南渡僑  
居會稽之上皇村高祖庚之再徙天台赤城山  
下而上皇仍稱焉庚之貴傑于一鄉疏財急義

賑卹閭里延儒碩以訓子孫藹然仁厚長者也  
曾祖忠甫元温州路儒學正祖彥立父仲可皆  
隱德弗耀母寧海侯城方氏有賢行先生幼喪  
父克自樹疑然如成人勵志向學稍長習進士  
業經專治詩不事記誦績文必自己出再上弗  
第棄去曰士之學也貴乎知道豈徒為祿仕哉  
益自身心之學踐履篤實慨然有任重之意饑  
寒勞苦人所不能堪者處之怡然不以累其業

也遠近從學者常數十百人為之講說毫分縷  
鮮明白剴切而以孝弟忠信為本聽者感心經  
指授率皆有成邑大夫闕館公署之左請授子  
弟先生聞之曰予豈旦夕出入于公門歎不愧  
澹臺滅明乎邑大夫皆曰先生古人也吾不敢  
屈遣子弟就學焉令尹皇甫公廉介自將遇先  
生尤厚暇則壺觴考德問政從容竟日先生通  
練懇慎言無不中蓋陰有蒙其利者而人弗知

也嘗屬疾逾月公數省視饋以藥物咸以公為  
得人先生既少孤事母以孝稱與兄守義相友  
愛人無間言兄卒撫其孤猶己子教之有立嘗  
長里賦鬻產以供費一毫不取於民亦有一二  
化之弗取者先生於朋友必輔以義直諒不阿  
面折不能容人之過人皆悅服門人仕者則勉  
以辨義利明取舍為立身之要廣州按察使夏  
君宗成來辭先生曰官尊得行志矣然大絃急

則小絃絕居敬行簡可也宗成曰敢不敬承先  
生之教其與人為善多類此成化二年五月二  
十五日以疾卒享年七十有三配張氏與先生  
合德有德耀之風子男一曰穎方業舉進士蓋  
先生蓄而未施者庶其在此孫男一曰恒穎卜  
以明年十二月初十日奉柩葬于赤城山烏岡  
之原纒經頓顙泣請於予曰願得一言為銘則  
先人雖沒猶不沒也賈社世有姻好予少與先

生同業切磋麗澤之益蓋多知先生者莫予若也  
也誼不得辭銘曰

學弗謀仕兮唯道之明鑽磨淬礪兮斯底于成  
游心古初兮孰知軒冕之為榮悅仁義為芻豢  
兮又曷慕乎八珍之烹唯其內之有得兮故其  
外曾不足為重輕赤城之麓衍迤兮土厚水清  
是為毅庵之歲兮魄降神升鍾和委祉兮尚利  
後人我銘昭之兮與山弗傾

南耕王公墓表

李東陽

台之黃巖有大族曰王氏其先出杭之錢塘唐  
季有大理少卿從德避地來居累傳至元臨海  
教諭昇昇生士傳士傳生世鉉世鉉生全祿有  
德于鄉實生南耕處士公諱阜字宗民自從德  
居寧溪至公為十有七世自世鉉遷縣南門至  
公為三世公有子五孫二十曾孫十有三同譜  
謀者以千數而其貴且賢者為公之子和州判

封刑部主事桓公之孫刑部員外郎今興化知府弼公壽既高會

朝廷推

恩凡天下八十已上者賜冠服有司欲以公奉詔辭不應鄉之人皆以地望稱為南耕處士年九十乃卒弘治己酉八月也公生而秀發有才畧父既老病家頗蹙公甫弱冠輒出應戶籍籍本匠役有工具為里戶所逋時貴溪周旭

鑑知縣事政尚嚴辨民死征調者甚衆縣符至族大恐公曰是在里戶令雖猛而明我其往告之情毋弟準曰往必不免兄死弟雖在無所與濟請代焉公乃以私財輸其十之四俾持以往且授之辭曰令以某辭問則以某辭對比至問荅一如公所授周矍然曰良民也釋而歸之自是待公特優亦因以重公公一力起廢奮不待助積勤成裕以復故業且益加拓焉弟早世婦

蔣未三十誓不嫁公撫其三孤底于成馭家以禮置祭田若干畝每時祭朔望謁已則集子姓申示勸戒以為常視諸族雖服屬疏遠不失恩意族人將有事于縣必先詣公公為理析徃徃有不終訟而去者蓋王氏為鄉望而公又其族之望也夫家之與官雖有公私小大其道一也官必有賢者長其屬則政成又必久任而不數易乃可以保于不變惟家亦然必有賢且壽者

長其族而後可興也然更任之久不久繫乎君而人之壽不壽則繫乎天故家之廢興隆替雖人力所致抑亦有莫之為者王之族所以微而復盛盛而不可窮也意天以是屬之公乎為公之後繼成業而家遺麻者固不可一日忘也余觀翰林侍講方石謝先生所撰壙志知公德為詳乃用興化君請表於其墓墓在縣東壩頭王氏世所葬地公配李氏先公九年卒且葬公卒

之年十二月 啓竈而寔因以李附之

蔡侯軒先生墓表 黃孔昭

成化庚寅十月二十有五日後軒蔡先生壽八十有二考終于家越歲戊申始克葬于東奧山之原明年其子丹陽教諭敦遣其子薇持書來告予曰敦先人墓石未立行義未白于世敦罪實深惟知先人者莫如子其為我表諸孔昭忝壻先生季弟巴東尹慕陶居士之女素辱知愛

曷敢以不文辭謹再拜受書而言曰先生諱仵字尚朋姓蔡氏號侯軒其先黃巖象山人七世祖和為西橋李氏贅婿遂徙居焉曾祖顯道祖伯昭父叔茂行義重于鄉里里人不名咸稱為生白翁西橋之蔡蓋至翁而益顯母王氏兄弟六人先生嘗以父命後其伯父季安安人寧溪王氏子男四長燭以春秋累舉不第次魁南京光祿寺監寺次燿次即丹陽丹陽之子餘

慶以進士而為中書舍人他孫曾餘二十人率  
挺挺有志先生清靜狷介而心實平恕自幼讀  
書慕義樂與人為善里巷子弟有願從學者悉  
進教之無倦歲市童蒙書給資貧無書者居常  
葛巾布裳蕭然塵外世之嗜好若一無芥蒂於  
心事所後父母生死能以禮而孝不替於所生  
兄弟欲均分父產固以義讓弗受至於故師趙  
季潛臨終報謝以古書數千卷拜却之監事

魁以綿衣一襲來猷亦作詩還書戒焉待子姓  
嚴而有恩族子炯孤貧贅于外家外家強欲奪  
其女改嫁之先生委曲周全析屋與居使終身  
保有妻子之養與人交相規以正有過失不問  
其實富必直言面質無隱諸弟或咎其已甚則  
曰交友之道當如是也為詩有風飄集數卷藏  
于家先生行修於身教成於家而譽聞于鄉者  
如此則其得於天者自宜有以異於人也世之

人莫不以壽考子孫厚望於天而所以求諸已者顧或未至於乎夫豈獨厚先生哉孔昭不佞敢次先生行履梗槩表諸墓後之人或有考於天人感應之理焉

赤城後集卷之二十五終

赤城後集卷之二十六

寶慶府知府謝公墓表 李東陽

吾友謝方石鳴治書報其叔父寶慶公之喪以墓表屬予予投淚泣曰嗟乎公不可作矣予小子夙奉知遇聯舟比席書牘相往復意勤勤不厭誠不意其遽至此敢有所孫不為公身後役哉其文曰公姓謝氏諱省字世脩世居台州黃巖縣今分隸太平縣為宋康樂公靈運之裔

國朝孝子溫良之曾孫祖諱立孝諱全贈南京  
兵部員外郎以縣學生舉鄉貢士登進士歷官  
南京兵部車駕主事武選員外郎至湖廣寶慶  
府知府階承德郎奉直大夫至中順大夫在車  
駕領馬快舡及太僕孳牧馬以百千計謂為姦  
利所萃祿奉外不私一錢在武選嘗市一奴後  
知為武官子亟還之仍俾從優給例襲父職在  
寶慶推堂食錢月數緡為公用條民隱十四事

上子

朝以春秋再行鄉野給民牛種多至數百會府  
歲所積可支五年乃簡諸生少俊者教之教于  
社而公食之者倍其數又撮朱子家禮并作十  
勿詩俾民誦習督民婚喪以拘忌弗舉者數家  
黜知縣二人籍其贓以代民賦湖南北稱良吏  
第一公顧有所掣謂不盡用乞為教官不許連  
乞養疾亦不許既三年考績至中途上䟽徑歸

當道者交章薦之而公竟不至吏部蓋公自景  
泰五年入官至是為成化九年年僅五十四而  
已民相與刻石紀德越二十年思之不衰公歸  
無厚積割私田若干畝創為祠堂歲一率宗人  
祭始祖之墓既又與從兄封翰林編修世衍築  
會總庵作敦彝十二會以合族又立鄉約數事  
開義學以教鄉之子弟若干人從子鳴治以翰  
林侍講國子祭酒兩歸其鄉公與作望海仰高

采藻三亭日夕遊眺大夫士相傳為東南名勝  
地以公號台南逸老稱為逸老先生鳴治為方  
石先生兩先生文學論議相下上名節相激厲  
自謝氏有孝子節婦以來至是乃益顯公所著  
有行禮或問杜詩註解及諸詩文稿藏于家而  
其詩尤清鍊脫俗為識者所重云公壽七十四  
以弘治六年十二月七日卒七年二月朔日窆  
于桃溪東山之壽藏鳴治既銘公又暨其鄉士

陳儒珎郭端朝輩議用吳淵頴故事私謚之曰  
貞肅嗚呼古者官人必言載采采中世鄉評或  
行覈而月更之貴實也公踐履施措有古君子  
之風顧進難退易寡施而多斂後之人或未能  
悉也予故核行指事籍數而書之以與銘並傳  
焉公配宜人王氏子四巖先公卒次彩業休孫  
四孝閭儉祐巖彩孝皆縣學生彩出為公弟王  
城山人世懋後公命也

刑部侍郎林公墓誌銘 丘濬

成化十二年十二月丁丑刑部右侍郎林公卒  
于位

皇帝震悼命翰林院撰文禮部官諭祭工部營  
葬事其諭祭之文有曰存心正大操履端方有  
守有為賢聲日著一時士大夫凡與公厚者方  
以公不幸不極其用而遽爾隕逝為憾及得諭  
祭之文莫不感嘆稱誦咸以謂

皇言雖簡而公平生大槩盡見于此死且不朽  
矣公卒時家無餘貲子保薇甫十一歲惟一僕  
在側經理其喪事者邑人吏部黃郎中孔昭翰  
林謝侍講鐸二君乃徧訪公之歷履行事於其  
僚友門生故吏條以示予請序以銘焉公諱鶚  
字一鶚其上世自閩之長溪徙台之黃巖近析  
邑之太平鄉為縣故今為太平縣人曾大父諱  
養民號石林大父諱從叅俱不仕父諱純仕為

湖口縣學訓導母趙氏生母程氏公登辛未進  
士第明年拜江西道監察御史階承事郎三年  
考稱給

敕進階文林郎贈父如已官封適母太孺人丁  
丑擢鎮江知府壬午當道者以鎮江事簡而公  
才長於治劄請以蘇州知府姚堂兩易其地  
詔如其請公在蘇州僅一年超拜江西按察使  
又三年即遷右布政使尋轉左庚寅拜南京刑

部右侍郎階嘉議大夫未幾丁趙太孺人憂服  
除召為刑部右侍郎通前滿考錫  
誥進階通議大夫贈祖及父皆刑部右侍郎母  
趙加淑人生母程始封太淑人公始終歷六官  
再守大郡二刑曹於兩京出入中外率稱官守  
其為御史時適

朝廷方重臺諫一時言事之臣摭摭或過其實  
公獨持大體略細故有所不言言必當其實與

山陰沈性齊名而簡靜過之時舉以總三法司  
奏按士論翕然推重嘗監京府試大臣子有不  
預薦者意考試官故黜落之以沽彊直名誣其  
取士不公公邑人林挺適入試在中列疑公有  
私逮挺考訊將中公以法及調所試卷考驗皆  
如格事遂得白

英宗復辟凡前日言事臣過訐者率左遷其官  
特召大臣擢其得大體者知大郡公得鎮江陞

辭召見諭以擢用之意賜食大官兼給鈔為道里費公感

上知遇至郡舉偏補弊凡前政之廢弛者次第興舉之未嘗一言暴前人非惟曰必如是乃是及調蘇郡蘇俗喜誇詐好興作公一切鎮之以靜有所建革必詳審至再然後施行蘇人以公有雅望責旦夕效於是頗有後言久而見公所處置事一一各有深意然後帖然大服鎮江漕

河經孟瀆頗險言者請鑿河自七里港引金山上流通丹陽以避之巡撫都憲王其議公以迂遠而多石且壞民廬墓多言於大臣請按京口牒甘露壩故迹因而浚之以通舟楫春夏以牒秋冬以壩則道里近而功力省從其言果便至今人過者必指曰此林太守之功也蘇學廟像歲久多剝落者或欲因其舊而加以修飾公奮然曰塑像非古我不

太祖於太學易以木主百年夷俗乃革彼未壞者猶當毀之幸遇其壞易以木主有何不可或以毀聖賢像為疑公曰此泥土耳豈聖賢耶孔子生於佛教未入中國之前烏識所謂泥像哉况古人席地而坐政不如此也聞者莫不竦服廉憲江西一時僚貳分巡各道者人異其見往往用已意出入于法公一正之以律多所平廣信民妄傳天神夏尚書等遠近驚疑公榜諭之

且截其魁其恠遂息又嘗以歲饑奏減恒賦十五萬石禁樂戶買良家女為娼遏嶺南洞寇不使入境江西士大夫至今稱良方面者必歸公焉在刑部三年罪無大小必加研審其或未當必從容請于大司寇務得其情合于法而後已故獄經公者咸稱無冤云公事之暇輒危坐閱書史臨古帖作楷書夜分乃止五鼓輒起率以為常聞人有異書必求之既得手自校讐有未

安者訪善本是正奉身儉薄甚簡言語嗜好待  
下過嚴而於交遊不苟合事母程淑人尤極其  
孝敬毋性嚴終日侍立未嘗少假以辭色有所  
不愜意則跪請移時雖中夜不敢離左右家事  
大小一以咨決馬嗚呼若公者豈古所謂篤行  
君子者歟卒時年五十有四配王氏初封孺人  
進淑人子男三長保業先公 年卒次即保薇  
次保薦甫五歲官給舟歸其喪將以 年 月

日葬于縣北芝山之原七世祖墓如銘曰

君子之守君子之道惟心之安匪時之好毅毅  
林公質直而峭不違以顏不從以貌為之在我  
曷計其效外崇其壙內深其突曰今之人亶古  
之肖我擬所行節以其要銘其幽宮以詒厥紹

兵部主事王君墓誌銘

彭韶

成化五年十二月二十三日武選主事王君卒  
其僚之長范君德章合諸鄉舊致賻祔凡棺槨

資送皆極堅美又經紀其歸道之所從與其乏  
一不以煩其子人皆曰是篤於交義者又曰非  
王君莫之致之予是以質諸所知則君剛介士  
也膏中平易無他與人交若可狎然意不合不  
苟隨慨然欲以所守自見於世遇氣義事輒欲  
為之或不自為而他人為之亦忻躍如已出時  
待選吏部視天下之事有不慊于懷者嘗草五  
事之疏將上而疾作及卧疾也畿輔以少雪為

憂有狂道士欲以妖術致雪者群臣莫肯言君  
勃然曰是侮天也夫言之不從是或不義厥咎  
僭厥罰恒陽返之之道在乎張主威踈女寵斥  
宦寺去侈汰遠奸佞使群陰剝而一陽復然後  
沛然號令於天下以收人心以還和氣如是而  
雨雪不時未之有也乃力疾援筆疏數千言將  
叩鐸而甘心焉然竟困憊不能成章但見寤寐  
中時隱隱自語細聽之則皆疏中語也越數日

不起嗚呼推君之志要將視天下不平事為已  
責必不以規規以苟位為樂者而乃百不一試  
僅四十二而終豈不重可惜哉君諱崇字尚德  
世居臨海黃土山其先太原人唐冬官侍郎暉  
出刺永嘉留居之至宋大理評事鑰又徙黃巖  
之成浦十五世為更一府君瀟來今所故又為  
臨海人至君六世矣曾祖永祖軫父統號安拙  
處士母鄭氏御史嘉之女也君少穎敏受詩于

教諭章先生唐受春秋于同知趙先生岳皆深  
有造詣而善馳騁為詞說者景泰癸酉以春秋  
舉鄉薦天順甲申始成進士授刑部四川司主  
事聞安拙處士喪還家能戚易兼至無違禮君  
子難之服闋留其孥以事母夫人獨從長子瓚  
來京改武選得疾未上而卒配洪氏子男二次  
璽君之疾也章先生適待次吏部日候見之死  
生之際先生驗其不貳而益許君平生云瓚將

以明年六月 日返葬君于澗灣山之原乃介  
章先生狀其行以請余銘余與君在刑曹實先  
後至有僚友之義不敢辭銘之曰  
明孰而牖安孰而持維彼喪心反是不思誓效  
涓埃以畢我辭曷不引年而嗇其施命也則然  
其又何悲嗟哉臣軌尚攷於斯

工部右侍郎黃公神道碑銘

李東陽

公姓黃氏本名曜字孔昭以字行更字世顯世  
家台州黃巖之洞山今太平地也然公猶居黃  
巖其先自昭武鎮都監緒避五季亂徙自閩者  
十七世矣曾大父與莊大父諱禮遐有聞于鄉  
考諱彥俊正統丙辰進士兵部主事台之三世  
舉進士者自茲始公未冠自京師扶母金夫人  
喪歸比北上職方公繼喪復匍匐反葬皆成禮  
弟妹俱弱躬撫育成之貧不廢學初以明經舉

不合乃為縣學生舉景泰丙子鄉薦登天順庚辰進士初

命為工部屯田主事司多積弊公稍持以正同官者不能堪嗾惡吏搆之事既白彼坐落職而公顧繇是起名遷都水員外郎督造江南餽遺無所受會吏部文選官以事去一司為空朝廷慎簡諸曹更補其缺公與焉未幾遷郎中凡天下州縣地善惡政令簡繁人材賢不肖極

力蒐訪耳注籍記罔不周悉而辭涉請託則未嘗少徇惟守法執論以贊其官之長為之長者雖不盡用亦以輿議付之有怨亦藉以自解公有所薦既得則喜見眉睫或用非其志則退而愀然以憂先後十五年稱文選之賢者必曰黃郎中黃郎中公既滿九載待次久之擢右通政督武職錄黃事事簡甚無以自見弘治戊申給今天子大明黜陟兩京大臣多所更置公擢南

京工部右侍郎時工作繁錢課頗匱貸民間為用公曲為區畫償其逋以萬計有空廨地十餘所為勢家所侵奏復之近令大臣得舉方面官公初薦靈州樊廷璧自知府超擢按察使繼薦金華章德懋時章以按察僉事致仕例不得起人益以躋公吏部侍郎再闕諸大臣以公名階彭公鳳儀張公時敏薦雖未調而人望之日愈不厭偶得熱疾三日遽卒辛亥六月十七日也

享年六十四其子工部主事備適以公事至南京遂扶喪歸訃聞朝廷賜祭命有司營兆域于委羽山之原十二月十八日葬焉公體貌嚴重不躁語不戲笑沈靜自守厚倫睦族以舊居讓弟女弟貧割俸金給之立義塾擇族子弟為師歲出束脩為之北讀書尚理致尤精詩格不苟製所著有定軒集若干卷藏于家配淑人蔡氏巴東知縣思之女子男三長即備世守公

志次佺次佐皆早卒孫五紹繹綰約紉綰以蔭  
為國子生黃巖之仕者若寶慶知府謝愚得先  
生及其從子方石祭酒皆天下士公交其叔姪  
間最深予用是知公公之喪方石實銘之備上  
京師請予銘墓道之石乃撮其大者為文而系  
以銘銘曰

台多賢郡公其顯者官為吏曹實柄用舍惟  
辟威福矧官有伯豈予敢私有厲方惕人以豔

我亦或覘我我非吾喪終弗玷我古亦有言東  
隅桑榆功我弗屑矧惟宦途公為六曹實貳卿  
位人弗過我謂有餘地我棄其餘歸諸造物有  
能肖之公死不歿

廣東左布政使陳公墓表

張元禎

嗚呼此吾友陳公士賢之墓公有天下不可斂  
之大節有足以濟天下之大才有不可遏於天

下之大勇

國家承平日久士夫多厭厭無氣節間有之而  
檢身之功或歎焉故其發之也不耀而其持之  
也不恒如吾士賢則何可議哉何可議哉公諱  
選士賢其字別號克庵世家臨海由鄉薦同吾  
第庚辰進士試禮闈時為第一人筮仕監察御  
史巡江西理河南山西湖廣福建四道及三法  
司事出督學政於南畿陞河南按察司副使

初治軍政繼仍

命督學未幾轉按察使太夫人卒服除陞廣東  
右布政使亦未幾轉左布政使公為御史正色  
直言不知權貴尤嚴於君子小人之進退時有  
二儒臣將援幸闈以柄用者公力擊之得不進  
脩撰羅倫以論時宰奪情謫官公抗章留之不  
報其督學也正己以範物日與諸生講明聖賢  
正學丁寧以務實近裏毋徒辭章口耳之事兩

地士風聿為之變長憲

命下立辯釋死獄數百貪酷吏為當道所親知者百餘輩悉斥去不兩月衆弊一清幸閣有廣東人勢燠灼甚在

京嘗來謁不與見其弟豪占孀婦之居甫下車亟效還之市舶之閹肆虐嶺表諸司素無敢何公獨不少徇閹目誣公數事

詔使臨覆之無一可以緇公者在廣敷

德意恤民隱更張弊政惟日不足寃抑之平反者亡慮數蘇門峇刺國入貢供費當鉅萬撒馬兒罕使臣欲航滿刺加市獅子以

獻公具疏民貧不堪擾且謂翫野獸恐貽笑外番俱請却之公福建右布政使諱員韜先生之仲子自幼沈毅寡言笑嘗從游檢討陳先生璩之門其學粹然一出於正其操履恪然一出於誠其居此官即欲盡此職其行此事即欲盡此

心其視去就升沈甚輕心一在於生靈

國家餘不恤也宦轍所至無不感動響應者巡  
江西江西人到今萬口一辭稱頌為名御史  
南畿河南繼公提學者屢矣然切切感慕者惟  
公以憂去河南士民遮道泣送者萬計復相率  
立生祠及去思碑被闖誣時兵民數萬填溢衢  
巷號訴於 詔使多涕泣者闖復以賂啖公所  
黜吏張褻者證公吏死不從公名滿天下天下

士夫無問識不識論一時正臣必僉曰陳某陳  
某都風紀者或乏必僉曰此非陳某不可典銓  
衡者或非其人必僉曰此非踰陳某者公歷官  
乘三十年俸餘悉以置思遠庶祀其祖及賙其  
族人家更無贏資寄死於吾南昌無以殮吾與  
閔都憲珪侯方伯英及其鄉人王國賓永壽應  
王相璧共贖之柩歸復無以葬浙憲使戴君珊  
更檄其郡邑資焉卒成化丙午之月二十一日

距其生宣德己酉十一月二十八日享年五十  
八葬之明年正月一日地曰八疊山毋金贈夫  
人繼母沈封太夫人配王封孺人繼配張子男  
三藩翼戴女二孫男三恪協愷女一公之卒吾  
南昌也將易簣氣絲絲語予曰死能遺我以不  
隨世磨滅者惟子子吾知友中惟知我也久且  
深嗚呼公之卒識者痛哭聞者痛心公之風聲  
氣驟足以震動手一世蓋深乎其植煥乎其發

非彼不本諸其躬者士習得公而人以端士氣  
得公而人以振積益久將所漸者益深陟益峻  
將所被者益溥頤位僅如是而壽僅如是悲夫  
茲豈公之不幸寔吾人之不幸世道之不幸也  
謹投淚而表諸墓上之石

鄉貢進士趙君墓誌銘 楊守陳

君諱慥字允孚其先汴人有諱不若者丞台之  
黃巖縣因家焉族蕃以昌世有顯者曾大父良

赤城後集卷之二十一  
嗣大父友迪父季諾皆隱德不耀母楊氏君少  
穎邁有巨人之志十六為邑庠生從鄉先達兵  
部主事章君陟學進士之文文與其齒偕長如  
連山出雲鵬騫而驥騫秋水灌河而兩涘不辯  
牛馬耆生宿儒見之皆避席而舍景泰元年鄉  
試有司見其文曰是可扛龍文百斛鼎者遂擢  
經魁第三人鉅梓其文天下誦而式之明年會  
試中乙榜例授教職不就乃入胄監攻苦磨厲

學日奧博間為序記詩賦諸作亦皆得其體裁  
而進士之文益工名章徹僉以會闈首選望之  
而再試屈於人歲久例赴常銓亦不就欲必得  
甲科以酬其志天順五年夏五得疾至六年三  
月四日卒于寓館距其生永樂壬寅得年四十  
有一君為人孝友行於家信義行於鄉國言必  
擇而發動不詭於道其志欲大有為以自見雖  
連蹇困踣而未嘗少衰其心篤於自信逮疾久

大漸猶慨然曰吾行不畔天天其俾予至此極也疾倘間乎言已而暝可哀也已嗚呼古者學校選舉之制教之以德行道藝而與其賢以能者其法精其途一其有司皆明而不惑士生其時孰有抱德藝而負屈抑之嘆者哉今也不考其德而徒較其藝以第其甲乙以為其終身資序之崇庠而較第之者又不必皆明有司也倖而甲屈而乙者不鮮矣若君者既屈矣然猶有

所待而不幸不得其壽故卒不獲伸其屈遂其志也其命也夫君娶陳氏生一子曰崇方晬而君卒囊無遺貲館入刑部主事姑蘇陸君昶義士也厚賻之而鄉人故舊哀而賻之者尤衆余其鄉試同年也既哭賻之又為之銘俾其弟同甜歸以識其墓在三桐鄉金輿之原葬在天順六年十一月日銘曰

孰賈不售孰植不茂胡俾子之獨竒而不偶人

耶天與職此之咎我銘昭之庶其不朽

明故謝君墓誌銘

岳正

謝君諱績字世懋初號靜可學成因所居有王城之山更號曰王城山人其先宋經畧使鞅自會稽謫居黃岩傳九世入

國朝諱溫良世稱孝子者避地元季晚方定居桃溪桃溪今隸太平君孝子曾孫也為太平人大父諱原叅葆光林下名泉石翁標白本懷父

諱性全贈奉訓大夫兵部員外郎雅志家法故號友松友松再娶皆陳四子省復君母兄也省登甲戌進士兵部員外郎今知寶慶府復早世其最季者濟君諸弟也君於學師父友兄弟貫徹為經實際為緯弗正行弗任以組織人謹以古迂雖屢弗恤也畢竟智者不能不躋之嘗就

有司試者七不合擬今必合迫期忽病病革遺言寶慶云仕當先幾完名未及試五日竟不起

年四十有四娶張氏出止女幼未有歸友人高  
廷美輩殯之杭郊訃達從兄世遠扶護以歸君  
家世故孝友後母無出事不遺力與寶慶出處  
相違廿年各再歸省會即姜被夜談幼弟孤姪  
撫同所出族里孚服每以媿君為畏諸從遊者  
若從子今翰林編修鐸字鳴治鄉進士施槃其  
顯者製作有王城山人集史官李賓之序之曰  
君詩初出入盛唐盡流麗之妙晚更步趨少陵

其感時興物之音一出於正詩家曰不誣文選  
員外即黃君孔昭君知己也狀君之行甚悉既  
追許其致用必效有可觀者又悼其卒困死以  
科目於乎予嘗謂古科目人法兼任尚有遺材  
世遠人嫌使如君者竟至此極抑君命當然耶  
可悲也已初寶慶且入

觀本圖會君浙上遽意哭君之死乃命子彩後  
君卜用卒之明年 月 日葬君前山之原嗚

治曰先師之墓宜得予銘為之銘曰  
生也淑壽而毅我匪跽奚其桔誰其歎天詰虐  
酷

按察僉事林君墓表

黃孔昭

君林氏諱壘字克賢後以字一中自少敏而好  
學早遊邑庠以書經薦于禮部屢試得進士出  
身授刑部主事以法律自守罪人情與律當者  
雖重未嘗姑息苟律與情未當則必求其平而

不為威勢所移錦衣古詔獄也故事錦衣有成  
案雖寃刑部不敢反阮成者錦衣當以大辟君  
審知其寃惻然曰殺人以媚人壞

朝廷法吾豈為哉請於司寇陸公必奏減其罪  
而後已自是能蔽益著有獄恒以屬君君多所  
辯決如王宗穰得不坐以投匿名文書則當時  
朝士所共也主事始踰考即陞為員外郎且兼  
看詳三法司奏案廷無滯獄君之功蓋多焉未

幾以才推為福建案察司僉事所至激濁揚清  
官吏望風畏懾各思洗濯以自新凡事便於民  
及有補於教化者為之無顧忌清軍御史尹仁  
所行多不法君與同職張鵞旨斥之尹憾焉逮  
君以憂去遂媒孽其後事不得則大訕於當道  
以沮君之進服闋再為福建僉事君略不介意  
益盡心於其職之所當為者莆有大臣縱豪奴  
震鄉里府縣莫敢如何君悉收置之法彼深以  
為耻亦日思所以擠君君巡福寧道滿當代適  
海賊為患衆謂安輯莫如君巡按御史閻佐遂  
檄君再巡一年君至撫治有方不煩餘力而海  
道寧息在福建兩監鄉試去取一以公有欲以  
私意上下者極力爭之不少徇福建去

京師遠武臣多不法君按治之不少恕至有乘  
大臣私憾肆言誣毀雖莫能浼然當道惑其說  
屈君十年不遷至公論定薦章方上而君又以

憂去矣及家未踰時即感危疾予在京師始  
聞今國子祭酒鳴治勿藥之報豈意君竟由此  
不起實成化乙巳七月二十有八日也距其生  
宣德辛亥得年五十有六而已嗚呼惜哉君族  
徙自閩居今太平泉村已十有幾世曾祖周氏  
祖從深父居止母胡氏君在朝得封父為刑部  
主事母為太安人妻陳氏封安人子男二出側  
室陳氏長保昌補邑庠生次保旦尚幼女二安

人出黃岩張鯨樂清章燁其壻也君少學於叔  
祖考功負外郎茂弘先生既仕以其兄侍郎一  
鷄為師友平生忠孝伉直志意廣博好隨事立  
功名與人接徐言緩步侃侃以善相道未嘗少  
媿阿以苟容可謂能正行直道者矣而其位止  
於是何也蓋世之處高位者非隨時觀勢輕重  
其法以要譽於當道於鄉之宦達則荒謏悖冒  
務以私智立聲威烜赫人耳目二者皆非君所

長而乃以公法求盡當為之職則其不為世所  
好亦宜也君讀書好窮古今治亂興衰及諸名  
臣行事之跡文章學宋大家波瀾狂行所存有  
柳齋稿若干卷君自登太學至歷仕外藩所交  
名士甚衆求其歷少壯顯晦以道義相磨切至  
老無間於一膜者則惟鳴治與予二人也鳴治  
於其終謂所托以不死者在我二人故初以銘  
文屬予既將掩其墓鳴治自為銘仍以稿馳示

京下俾予為文以表其墓上之石嗚呼予平生  
所望於一中者僅止於是忍不為之表耶惟一  
執筆則哀思萬萬故去君之葬踰年而未能成  
今姑掇其平生大槩授其子保昌使刻諸墓以  
表著之庶後之人欲知君之所未識者有考焉

赤城後集卷之二十六終

一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十

今古類事卷之二十一  
一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十



